

四庫全書

史部

欽定四庫全書

文獻通考卷二百九十六

鄱陽馬端臨貴與著

物異考二

水災

春秋桓公元年秋大水董仲舒劉向以為桓弑兄隱公
民臣痛隱而賤桓十三年復大水一曰夫人驕淫將弑
君陰氣盛桓不悟卒見殺莊公七年秋大水亡麥苗

董仲舒劉向以為莊公母與兄通共弑桓公莊釋父讎
復取齊女臣下賤之之應 十一年秋宋大水董仲舒
以為時魯宋比年為乘邱鄆之戰百姓愁怨陰氣盛故
二國俱水明年宋萬弑閔公 二十四年大水董仲舒
謂夫人哀姜淫亂不婦陰氣盛也 宣公十年秋大水
董仲舒以為時北伐邾取邑亦見報復兵讎連結百姓
愁怨 成公五年秋大水董仲舒劉向以為時成幼弱
政在大夫三家專兵陰勝陽 襄公二十四年秋大水

劉向以為襄慢鄰國邾齊莒交伐之魯國小兵弱數敵
强大百姓愁怨陰氣盛

漢高后三年夏漢中南郡大水水出流四千餘家 四
年秋河南大水伊雒流千六百餘家汝水流八百餘家
八年夏漢中南郡水復出流六千餘家南陽沔水流
萬餘家是時女主獨治諸呂相王 文帝十二年十一
月河決東郡後三年秋大雨晝夜不絕三十五日監田
山水出流九百餘家渰壞民室八十餘所殺三百餘人

時新垣平得幸立渭陽五帝廟郊見上帝後歲餘謀為
逆誅夷又匈奴數犯北邊殺略甚衆漢連歲征討武
帝建元二年春河水溢於平原元光三年春河水徙
從頓邱東南流入渤海五月河決濮陽汜郡十六發卒
十萬救決河起龍淵宮元鼎二年夏大水關東餓死
以千數元帝初元元年關中十一郡大水二年北
海水溢流殺人民五年夏及秋大水潁川汝南淮陽
廬江雨壞鄉聚民舍及水流殺人先是一年有司奏罷

郡國廟是歲又定迭毀罷太上皇於惠帝寢廟皆無復
脩刑臣石顯用事 成帝建始三年夏大水三輔霖雨
三十餘日郡國十九雨山谷水出凡殺四千餘人壞官
寺民舍八萬三千餘所 四年河決東郡金隄一陽
朔二年秋關東大水

王莽始建國二年河決魏郡泛清河以東數郡

後漢光武建武六年東郡以北傷水 七年六月戊辰
雒水溢至津城門弘農都尉治為水所漂殺民人傷稼

及廬舍 八年秋大水 三十一年五月大水 明帝

永平三年京師及郡國七大水 七年秋郡國十四大

水 和帝永元元年七月郡國九大水傷稼

穀梁傳曰高下有水

災曰大水京房易傳曰顓事私知誅罰絕理厥災水其水也

雨殺人隕霜大風天黃饑而不損茲謂泰厥災水殺人
辟遇有德茲謂狂厥災水流殺人已水則地生蟲歸獄
不解茲謂追非厥水寒殺人追誅不解茲謂不理厥水
五穀不收大敗不解茲謂皆陰厥水流入國邑隕霜殺

穀春秋考異郵曰陰盛臣逆民悲情發則水出河決也是時和帝幼竇太后攝政

其兄竇憲幹事及憲諸弟皆貴顯並作威讒虐常所怨

恨輒任客殺人其後竇氏誅滅十年五月丁巳京師

大雨山水流出至東郊壞民廬舍十二年六月潁川

大水傷稼時和帝幸鄧貴人廢陰后殤帝延平元年

五月郡國三十七大水傷稼董仲舒曰水者陰氣盛也

是時帝在襁抱鄧太后專政

臣昭按本紀是年九月六州大水袁山松書曰六州

河濟渭雒洧水盛長泛溢傷秋稼

安帝永初元年冬十月辛酉河南

新城山水譟出突壞民田壞處泉水出深三丈是時司空周章等以鄧太后不立皇太子勝而立清河王子故謀欲廢置十一月事覺章等被誅是年郡國四十一水出漂沒人民

謝沈書曰死者以千數

識曰水者純陰之精也陰氣

盛洋溢者小人專制擅權妒疾賢者依公結私侵乘君子小人席勝失懷得志故涌水為災

二年大水

臣昭按本

紀京師及郡國四十有水周嘉傳是夏旱嘉收莽客死骸骨應時澍雨歲乃豐稔則水不為災也

三

年大水

臣昭按本紀京師及郡國四十一雨水

四年大水

臣昭按本紀云三郡

五年大水

臣昭按本紀郡國八

六年河東池水變色皆赤如血

水變占曰水化為血者好任殘賊殺戮不辜延及親戚水當為血

是時鄧太后猶專政

古今註曰元初二年潁川襄城臨水化為血京房占曰流水化為血兵且起以日辰占與其色博物記曰江河路涉蘇於河以處

延光三年大水流殺人民傷苗稼

是時安帝信江京樊豐及阿母王聖等讒言免太尉楊

震廢皇太子

臣昭按左雄傳順帝永建四年司冀二州大水傷稼楊厚傳永和元年夏雒陽暴水

殺千餘人

質帝本初元年五月海水溢樂安北海溺殺人

物時帝幼梁太后專政

春秋漢舍孽曰九卿阿黨擠排正直驕奢僭害則江河潰決方

儲對策曰民悲怨則陰類
強河決海澹地動土涌

桓帝建和二年七月京師

大水去年冬梁冀枉殺故太尉李固杜喬 三年八月

京都大水時梁太后猶專政 永興元年秋河水溢漂

害人物

臣昭按朱穆傳云漂害數千萬戶京房占曰江河

物今溢者明在位者不勝任也三公之禍不能容也率執法者利刑罰不用常法

二年六月

彭城泗水增長逆流

梁冀別傳曰冀之專政天為見異衆災並湊蝗蟲滋生河水逆流五

星失次太白經天人民疾疫出入六年羌戎叛戾盜賊畧平皆冀所致燉煌實錄張衡對策曰水者五行之首滯而逆流者人君之恩不能下及而致逆也

潛潭巴曰水逆者反命也宜修德以應之

永壽元

年六月雒水溢至津陽城門漂流人物

臣昭按本紀又南陽大水

時梁皇后兄冀秉政疾害忠直威權震主後遂誅滅

延熹八年四月濟北水清

九年四月濟陰東郡濟北

平原河水清襄楷上言河者諸侯之象清者陽明之徵

豈獨諸侯有規京都計邪其明年宮車晏駕徵解犢亭

侯為漢嗣即尊位是為孝靈皇帝永康元年八月六

州大水渤海海溢沒殺人是時桓帝奢侈淫祀十一月

崩無嗣靈帝建寧四年二月河水清

袁山松書曰禱於龍陂

五

月山水大出漂壞廬舍五百餘家

袁山松書曰是河東之水暴出也

熹平二年六月東萊北海海水溢出漂流人物 三年

秋雒水出 四年夏郡國三水傷害秋稼 光和六年

金城河溢東出二十餘里 中平五年郡國六水大出

臣昭按袁山松書曰山陽梁沛彭城下邳東海瑯琊則是七郡

獻帝建安二年九月

漢水溢流害民田廬舍是時天下大亂

袁山松書曰曹操專政十七年

七月大水涌水溢

十八年六月大水

獻帝起居注曰七月大水親避正殿八月以

雨不止且還殿

二十四年八月漢水溢流害民田廬舍

明年禪位

魏於

魏文帝黃初四年六月大雨霖伊雒溢至津陽城門漂
數千家殺人帝自即位自鄴遷洛營造宮室而不起宗
廟太祖神主猶在鄴嘗於建始殿饗祭如家人禮終黃
初不復還鄴又郊社神祇未有定位簡宗廟廢祭祀之
罰也 明帝景初元年九月淫雨冀充徐豫四州水出
溺殺人漂失財產時帝崇飾宮室妨害農戰觸情恣慾
水不潤下之應

吳孫權赤烏八年夏茶陵縣洪水溢出漂二百餘家

十三年秋丹陽故鄣等縣又洪水溢出按權稱帝三十年竟不於建業創七廟唯父堅一廟遠在長沙而郊祀禮闕末年雖一南郊而北郊無聞吳楚之望亦不見秩反祀羅陽妖神以求福助簡宗廟廢祭祀之罰也太元元年又有大風涌水之異時權信讒廢太子又無年不用兵百姓愁怨孫亮五鳳元年夏大水亮即位四年乃立權廟又終吳世不上祖宗號脩嚴父禮廢二郊

不秩羣神罰同前又時孫峻專政陰勝陽之應 孫休
永安四年五月大雨水泉涌溢昔歲作浦里塘功費無
數而田不可成士卒死叛或自賊殺百姓愁怨陰氣盛
五年八月壬午大雨震電水泉涌溢

晉武帝泰始四年九月青徐兗豫四州大水 七年六
月大雨霖河洛伊泌皆溢殺二百餘人自帝即尊位不
加三后祖宗之號至泰始二年又除明堂南郊五帝座
同稱昊天上帝一位而已又省先后配地之祀此簡宗

廟廢祭祀之罰也 咸寧元年九月徐州大水 二年
七月癸亥河南魏郡大水殺百餘人閏月荊州郡國五
大水流四千餘家去年采擇良家子女露面入殿帝親
簡閱務在姿色不訪德行有蔽匿者以不敬論搢紳愁
怨天下非之陰盛之應也 三年六月益梁二州郡國
八暴水殺三百餘人七月荊州大水九月始平郡大水
十月青徐兗豫荆益梁七州又大水是時賈充等用事
專恣而正人疎外者多陰氣盛也 四年七月司冀兗

豫荆揚郡國二十大水傷秋稼壞屋室有死者 太康
二年六月泰山江夏大水泰山流三百家殺六千餘人
江夏亦殺人時平吳後王濬為元功而詆劾妄加荀賈
為無謀而並蒙重賞收吳姬五千納之後宮此其應也
四年七月兗州大水十二月河南及荆揚六州大水
五年九月郡國四大水又隕霜是月南安等五郡大
水 六年四月郡國十大水壞廬舍 七年九月郡國
八大水 八年六月郡國八大水 惠帝元康二年有

水災 五年五月潁川淮南大水六月城陽東莞

音大

水殺人荆揚徐兗豫五州又水是時帝即位已五載猶未郊祀其蒸嘗亦多不親行事此簡宗廟廢祭祀之罰

六年五月荆揚二州大水是時賈后亂朝寵樹賈郭女主專政陰氣盛之應也 八年五月金墉城井溢漢

志成帝時有此妖後王莽僭逆今又有此妖趙王倫篡位倫廢帝於此城井溢所在其天意也九月荆揚徐冀豫五州大水是時賈后暴戾滋甚韓謐驕猜彌扇卒害

太子旋以禍滅 九年四月宮中井水沸溢 永寧元

年七月南陽東海大水是時齊王冏

舉永反

專政陰盛之

應也 泰安元年七月兗豫徐冀四州水時將相力政

無尊主心陰盛故也 元帝太興三年六月大水是時

王敦內懷不臣傲狠凌上此陰氣盛也 四年七月又

大水 永昌二年五月荊州及丹陽宣城吳興壽春大

水 明帝太寧元年五月丹陽宣城吳興壽陽大水是

時王敦威權震主陰氣盛故也 成帝咸和元年五月

大水是時嗣主幼冲母后稱制庾亮以元舅決事禁中
陰勝陽故也 二年五月戊子京都大水是冬以蘇峻
稱兵都邑塗地 七年五月大水是時帝未親機務政
在大臣陰勝陽也 咸康元年八月長沙武陵大水
穆帝永和四年五月大水 五年五月大水 六年五
月又大水是時幼主冲弱母后臨朝又將相大臣各執
權政與咸和初同事也 七年七月甲辰夜濤水入石
頭死者數百人是時殷浩以私忿廢蔡謨遐邇非之又

幼主在上而殷桓交惡選徒聚甲各崇私權陰勝陽之
應也一說濤水入石頭以為兵占後殷浩桓溫謝尚荀
羨連年征伐百姓愁怨也 升平二年五月大水 五

年四月又大水是時桓溫權制朝廷專征伐陰勝陽也

海西太和六年六月京師大水平地數尺浸及太廟

朱雀大航纜斷三艘流入大江丹陽晉陵吳郡吳興臨
海五郡又大水稻稼蕩沒黎庶饑饉初四年桓溫北伐
敗績十喪其九五年又征淮南踰歲乃克百姓愁怨之

應也 簡文帝咸安元年十二月壬午濤水入石頭明年祆賊盧竦率其屬數百人入殿略取武庫三庫甲仗遊擊將軍毛安之討滅之兵興陰盛之應也 孝武帝太元三年六月大水是時帝幼弱政在將相 五年五月大水 六年六月揚荆江三州大水 八年三月始興南康廬陵大水平地五丈 十年五月大水自八年破苻堅後有事中州役無寧歲愁怨之應 十三年十二月濤水入石頭毀大航殺人明年慕容氏寇擾司寇

鎮戍西北疲於奔命愁怨之應也 十五年七月沔中諸郡及兗州大水是時緣河紛爭征戍勤悴之應也

十七年六月甲寅濤水入石頭毀大航漂船舫有死者京口西浦亦濤入殺人永嘉郡潮水湧起近海四縣人多死後四年帝崩而王恭再攻京師京師亦發衆以禦之兵後頻興百姓愁怨之應也 十八年六月己亥始興南康廬陵大水深五丈 十九年七月荆徐大水傷秋稼 二十年六月荆徐又大水 安帝隆安三年五

月荊州大水平地三丈去年殷仲堪舉兵向京師是年
春又殺郗恢陰盛作威之應也仲堪尋亦敗亡五年
五月大水是時會稽王世子元顯作威陵上又桓元擅
西夏孫恩亂東國陰勝陽之應也元興二年十二月

桓元篡位其明年二月庚寅夜濤水入石頭商旅方舟

萬計漂敗流斷骸骨

反在智

相望江左雖頻有濤變未有

若斯之甚三月義軍克京都元敗走遂夷滅之三年

二月己丑朔夜濤水入石頭漂沒殺人大航流敗義

熙二年十二月己未夜濤水入石頭明年駱球父環潛
結桓允殷仲文等謀作亂劉稚亦謀反凡所誅滅數十
家 三年五月丙午大水 四年十二月戊寅濤水入
石頭明年王旅北討 六年五月丁巳大水乙丑廬循
至蔡州 八年六月大水 九年五月辛巳大水 十
年五月丁丑大水戊寅西明門地穿涌水出毀門扇及
限亦水沴土也七月乙丑淮北風災大水殺人 十一
年七月丙戌大水淹漬太廟百官赴救明年王旅北討

關河

宋文帝元嘉五年六月都下大水 七年十二月吳興
晉陵義興大水 十二年六月丹陽淮南吳興義興大
水都下乘船 十七年八月徐兗青冀四州大水 十
八年五月甲申河水汎溢害居人 十九年閏五月都
下水 二十四年徐兗青冀四州大水 二十五年冬
青州城南遠望見地中如水出有影謂之地鏡也 孝
武大明元年正月庚午都下雨水

齊武帝永明九年吳興義興大水 廢帝永元元年七月都下大水死者甚衆

梁武帝天監二年六月太末信安安豐三縣大水春秋考異繇曰陰盛臣逆人悲則水出河決時江州刺史陳伯之益州刺史劉季連舉兵反叛師旅數興百姓愁怨臣逆人悲之應也 六年八月建康大水濤上御道七尺 七年五月建康又大水時數興師旅以拒魏軍

十二年四月建康大水時大發卒築浮山堰以遏淮水

勞運連年百姓悲怨之應也 普通元年七月己卯江
淮海並溢 中大通五年五月建康大水御道通船京
房易飛候曰大水至國賤人將貴蕭棟侯景僭稱尊號
之應也

後魏宣武帝元年州鎮十八水饑 延昌元年郡國十
一大水 二年十三郡大水

東魏孝靜帝元象元年山東大水蝦蟇鳴於樹上

後齊武成河清二年十二月兗趙魏大水 後主天統

三年并州汾水溢水者純陰之精陰氣洋溢者小人專制時和士開元文遙趙彥深等專任武平六年八月山東諸州大水時羣小用事姦佞滿朝

隋文帝開皇六年山南荆浙七州水十八年河南八州大水時獨孤后預政楊素頗專水陰氣臣妾盛強之應仁壽二年河南河北諸州大水時帝用刑嚴急京房易傳誅罰絕理則厥災水煬帝大業三年河南大水漂沒三十餘郡帝嗣位已來未親郊廟之禮簡宗廟

廢祭祀之應也

唐太宗貞觀三年秋貝譙鄆泗沂徐毫蘇隴九州水水
太陰之氣也若臣道顯女謁行夷狄彊小人道長嚴刑
以逞下民不堪其憂則陰類勝其氣應而水至其謫見
於天月及辰星與列星之司水者為之變若七曜循中
道之北皆水祥也 四年秋許戴集三州水 七年八
月山東河南州四十大水 八年七月山東江淮大水
十年關東及淮海旁州二十八大水 十一年七月

癸未黃氣際天大雨穀水溢入洛陽宮深四尺壞左掖
門毀官寺十九洛水漂六百餘家九月丁亥河溢壞陝
州之河北縣及太原倉毀河陽中渾十六年秋徐戴
二州大水十八年秋穀襄豫荆徐梓忠縣宋亳十州
大水十九年秋沁易二州水害稼二十一年八月
河北大水泉州海溢驩州水二十二年夏瀘越徐交
渝等州水高宗永徽元年六月新豐渭南大雨零口
山水暴出漂廬舍宣歙饒常等州大雨水溺死者數百

人秋齊定等州十六水 二年秋汴定濮毫等州水

四年杭夔果忠等州水 五年五月丁丑夜大雨麟遊

縣山水衝萬年宮元武門入寢殿衛士有溺死者六月

河北大水滹沱溢損五千餘家 六年六月商州大水

秋冀沂密兗滑汴鄭婺等州水害稼洛州大水毀天津

橋十月齊州河溢 顯慶元年九月温州暴風雨海水

溢壞安固永嘉二縣 四年七月連州山水暴出漂七

百餘家 麟德二年十月鄜州大水壞居人廬舍 總

章二年六月括州大風雨海溢壞永嘉固二縣溺死
者九千七十人冀州大雨水平地深一丈壞民居萬家
咸亨元年五月丙戌大雨山水溢溺死者五千餘人
二年八月徐州山水漂百餘家四年七月婺州大
雨山水暴漲溺死五千餘人上元三年八月青州大
風海溢漂居人五千餘家齊淄等七州大水永隆元
年九月河南河北大水溺死者甚衆二年八月河南
河北大水壞民居十萬餘家永淳元年五月丙午東

都連日澍雨乙卯洛水溢壞天津橋及中橋漂居民千餘家六月乙亥京師大雨水平地水深數尺秋山東大雨水民大饑 二年七月己巳河溢壞河陽橋八月恒州濤沱河及山水暴出害禾稼 文明元年七月溫州大水漂千餘家括州溪水暴漲溺死百餘人 武后如意元年四月洛水溢壞永昌橋漂居民四百餘家七月洛水溢漂居民五千餘家八月河溢壞河陽縣 長壽二年五月棣州河溢壞居民二千餘家是歲河南州十

一水 神功元年三月括州水壞民居七百餘家是歲
河南州十九水 聖歷二年七月丙辰神都大雨洛水
壞天津橋秋河溢懷州漂千餘家 三年三月辛亥鴻
州水漂千餘家溺死四百餘人 長安三年六月寧州
大雨水漂二千餘家溺死千餘人 四年八月瀛州水
溢壞民居數千家 中宗神龍元年四月雍州同官縣
大雨水漂沒居民五百餘家六月河北州十七大水七
月甲辰洛水溢壞民居二千餘家 二年四月辛丑洛

水壞天津橋溺死者數百人八月魏州水景龍三年
七月澧水害稼九月密州水壞民居數百家元宗開
元三年河南河北水四年七月丁酉洛水溢沉舟數
百艘五年六月甲申瀍水溢溺死者千餘人鞏縣大
水壞城邑損居民數百家河南水害稼八年夏契丹
寇營州發關中卒援之宿澠池之缺門營穀水上夜半
山水暴至萬餘人皆溺死六月庚寅夜穀洛溢入西上
陽宮宮人死者十七八畿內諸縣田稼廬舍蕩盡掌衛

兵溺死千餘人京師興道坊一夕陷為池居民五百餘
家皆沒不見是年鄧州三鴉口大水塞谷或見二小兒
以水相沃須臾有蛇大十圍張口仰天人或斬射之俄
而暴雨漂溺數百家十年五月辛酉伊水溢毀東
都城東南隅平地深六尺河南許僊豫陳汝唐鄧等州
大水害稼漂沒民居溺死甚衆六月博州棣州河決
十二年六月豫州大水八月兗州大水十四年秋天
下州五十水河南河北尤甚河及支川皆溢懷衛鄭滑

汴濮人或巢或舟以居死者千計潤州大風自東北海
濤沒瓜步十五年五月晉州大水七月鄧州大水溺
死數千人洛水溢入廊城平地丈餘死者無算壞同州
城市及馮翊縣漂居民二千餘家八月澗穀溢毀澠池
縣是秋天下州六十三大水害稼及居人廬舍河北尤
甚十八年六月壬午東都瀍水溺揚楚等州租船洛
水壞天津永濟二橋及民居千餘家二十年秋宋滑
兗鄆等州大水二十二年秋關輔河南州十餘水害

稼 二十七年三月澧袁江等州水 二十八年十月

河南郡十三水 二十九年七月伊洛及支川皆溢害

稼毀天津橋及東西漕上陽宮仗舍溺死千餘人是秋

河南河北郡二十四水害稼 天寶四載九月河南淮

陽睢陽譙四郡水十載廣陵大風駕海潮沉江口船數

千艘 十三載九月東都瀍洛溢壞十九坊 代宗廣

德元年九月大雨水平地數尺時吐蕃寇京畿以水自

潰去 二年五月東都大雨洛水溢漂二十餘坊河南

諸州水 大歷元年七月洛水溢 二年秋湖南及河
東河南淮南浙東西福建等道州五十五水災 七年
二月江州江溢 十年七月杭州海溢 十一年七月
戊子夜澍雨京師平地水尺餘溝渠漲溢壞民居千餘
家 十二年秋京畿及宋毫滑三州大雨水害稼河南
尤甚平地深五尺河溢 德宗建中元年幽鎮魏博大
雨易水滹沱橫流自山而下轉石折樹水高丈餘苗稼
蕩盡 貞元二年六月丁酉大風雨京城通衢水深數

尺有溺死者東都河南荆南淮南江河溢 三年三月

東都河南江陵汴揚等州大水 四年八月灞水暴溢

殺數百人 八年秋自江淮及荆襄陳宋至於河朔州

四十餘大水害稼溺死二萬餘人漂沒城郭廬舍幽州

平地水深二丈徐鄭涿薊檀平等州皆深丈餘 九年

六月淮水溢平地七尺沒泗州城 十一年十月朗蜀

二州江溢 十二年四月福建二州大水嵐州暴雨水

深二丈 十八年春申光蔡等州大水 順宗永貞元

年夏朗州之熊武五溪溢秋武陵龍陽二縣江水溢漂
萬餘家京畿長安等九縣山水害稼 憲宗元和元年
夏荆南及壽幽徐等州大水 四年十月丁未渭南暴
水漂民居二百餘家 六年七月鄜坊黠中水 七年
正月振武河溢毀東受降城五月饒撫虔吉信五州暴
水虔州尤甚平地有深至四丈者 八年五月陳州許
州大雨大隗山摧水流出溺死者千餘人六月庚寅大
風毀屋揚瓦人多壓死京師大水城南深丈餘入明德

門猶漸車輻辛卯渭水漲絕濟時所在百川發溢多不由故道滄州水潦浸鹽山等四縣 九年秋淮南及岳安宣江撫袁等州大水害稼 十一年五月京畿大水昭應尤甚衢州山水害稼深三丈毀州郭溺死百餘人六月密州大風雨海溢毀城郭饒州浮梁樂平二縣暴雨水漂沒四千餘戶潤常潮陳許五州及京畿水害稼 十二年六月乙酉京師大雨水含元殿一柱傾市中水深三尺毀民居二千餘家河南河北大水洺邢尤

甚平地二丈河中江陵幽澤潞晉隰蘇台越州水害稼
十五年秋洪吉信滄等州水 穆宗長慶二年七月

河南陳許蔡等州大水好畤山水漂民居三百餘家處
州大雨水平地深八尺壞城邑桑田大半 四年夏蘇

湖二州大雨水太湖決溢睦州及壽州之霍山山水暴
出鄆曹濮三州雨水壞州城民居田稼略盡襄均復郢
四州漢水溢決 敬宗寶曆元年秋鄜坊二州暴水充
海華三州及京畿奉天等六縣水害稼 文宗太和二

年夏京畿及陳滑二州水害稼河陽水平地五尺河決
壞棣州城越州大風海溢河南鄆曹濮淄青齊德兗海
等州並大水 三年四月同官縣暴水漂沒三百餘家
宋毫徐等州大水害稼 四年夏江水溢沒舒州太湖
宿松望江三縣民田數百戶廬坊水漂三百餘家浙西
浙東宣歙江西廬坊山南東道淮南京畿河南江南荆
襄鄂岳湖南大水皆害稼 五年六月元武江漲高二
丈溢入梓州羅城淮西浙東浙西荆襄岳鄂東川大水

害稼 六年二月蘇湖二州大水六月徐州大雨壞民居九百餘家 八年秋江西及襄州水害稼蘄州湖水溢滁州大水溺萬餘戶 開成元年夏鳳翔麟遊縣暴雨水毀九成宮壞民舍數百家死者百餘人 三年夏河決浸鄭滑外城陳許鄜坊鄂曹濮襄魏博等州大水江漢漲溢壞房均荆襄等州民居及田產殆盡蘇湖處等州水溢入城處州平地八尺 四年秋西川滄景湍青大雨水害稼及民廬舍德州尤甚平地水深八尺

武宗會昌元年七月江南大水漢水壞襄均等州民居甚衆 宣宗大中十二年八月魏博幽鎮兗鄆滑汴宋舒壽和潤等州大水害稼徐泗等州水深五丈漂數萬家 十三年夏大水 懿宗咸通元年潁州大水 四年閏六月東都暴雨水自龍門毀定鼎長夏等門漂溺居人七月東都許汝徐泗等州大水傷稼九月孝義山水深三丈破武牢關金城門汜水橋 六年六月東都大水漂壞十二坊溺死者甚衆 七年夏江淮大水秋河

南大水害稼 十四年八月關東河南水 僖宗乾符
三年關東水 昭宗光化三年九月浙江溢壞民居
乾寧三年四月河圯於滑州朱全忠決其隄因為二河
散漫千餘里

梁太祖開平四年十月滑宋許亳水

後唐莊宗同光二年秋水災 三年七月洛水泛漲壞
天津橋漂近河廬舍艤舟為渡覆沒者日有之鄴都奏
御河漲於石灰窰口開故河道以分水勢鞏縣河決注

倉敖 明帝長興三年七月諸州大水宋毫潁尤甚

晉高祖天福四年七月西京大水伊洛瀍澗皆溢壞天津橋八月河決博平甘陵大水 六年九月河決於滑州一溉東流居民登邱冢為水所隔詔所在發舟船以救之兗州濮州界皆為水所漂溺兗州奏河水東流濶七十里勢南流入沓河揚州河 出帝開運元年六月黃河洛河泛溢壞隄堰鄭州原武滎澤縣界河決

周太祖廣順二年七月暴風雨京師水深二尺壞墻屋

不可勝計諸州皆奏大雨所在河渠泛溢害稼 三年
六月諸州大水襄州漢江漲溢壞羊馬城大城內水深
一丈五尺倉庫漂盡居人溺者甚衆

宋太祖建隆元年十月棣州河決壞厭次商河二縣居
民廬舍田疇 二年宋州汴水溢孟州河溢壞堤蔡州
大霖雨壞道路行舟襄州漢水漲溢數丈 四年八月
齊州河決 乾德二年四月揚州廣陵揚子等縣潮水
害民田七月泰州山水暴漲壞居民廬舍數百區牛畜

死者甚衆 三年七月蘄州大雨水壞居民廬舍開封
府河溢陽武塞縣門河中府孟州並河漲孟州壞中渾軍
營民舍數百區河中壞石臺百餘步澶州河壞隄毀護
岸石百八十步又溢於鄆州壞民田泰州湖溢損鹽城
縣民田淄州濟水並清河溢害鄒平高苑縣民田 四
年四月鄆州東阿縣河溢損民田數百頃澶州觀城縣
河決壞居民廬舍注大名又滑州靈河縣堤壞水東注
衛南縣境及曹州南華縣城又七月鄭州滎澤縣河南

北堤壞又八月宿州汴水溢壞堤溜州清河水溢壞高苑縣城溺數百家及鄆平縣田疇民舍泗州淮溢衡州大雨水月餘五年衛州河溢毀州城沒溺者衆城中水深五尺開寶元年六月州府二十三大雨水江河汎溢壞民田廬舍二年二月車駕駐蹕潞州積雨累日未止七月宋州下邑縣河水決九月京師大雨霖是歲青蔡宿溜宋州水及雹害夏苗真定府澶滑澤博洛齊潁蔡陳宋毫宿許州水害秋苗三年鄭澶滑鄆溜

濟號蔡解徐岳州水災害民田 四年六月汴水決宋
州穀熟縣濟陽鎮又鄆州河及汶水清河皆溢注東阿
縣及陳空鎮壞倉庫民舍鄭州河決原武縣蔡州淮及
白露舒汝廬潁五水並漲壞廬舍及民田七月青齊州
水傷田 五年五月京師雨連旬不止河決澶州濮陽
縣河南河北諸州皆言大雨霖絳和廬壽州大水六月
河又決開封府陽武縣之小劉村宋州鄭州並汴水決
忠州江水漲二百尺 六年六月鄆州河決楊劉口懷

州河決獲嘉潁州淮淝水溢渰民舍田疇甚衆七月貝
州歷亭縣御河決單濮州並大雨水壞州廨倉庫軍營
民舍是秋大名府宋毫淄青汝澶滑州並水傷田 七
年四月衛毫州水泗州淮暴漲入城壞居民五百家相
州安陽河漲壞居民廬舍數百區 八年五月京師大
雨水濮州河決郭龍村六月澶州河決頓邱縣沂州大
雨水入城壞民居舍田疇 九年三月京師大雨水秋
又霖雨淄州水害田 太宗太平興國二年六月孟州

河溢又漲於澶州壞英公村堤三十步陝州壞浮梁失
舟十五開封府汴水溢壞大靈隄浸害民田忠州江漲
二十五丈又興州江漲毀棧道四百餘間鄭州管城縣
焦肇水暴漲踰京水濮州大水害民田凡五千七百四
十三戶潁州潁水漲壞城門軍營民舍七月集州江漲
汎嘉川縣民十三戶是歲道州春霖雨不止平地水二
丈餘三年五月懷州河決獲嘉縣北注又汴水決宋
州寧陵縣境六月泗州淮漲溢入南城汴水又漲一丈

塞州北門十月滑州靈河已塞復決 四年三月河南
府洛水漲七尺五寸壞民舍泰州雨水害禾稼宋州河
漲宋城縣衛州河決汲縣壞新塲堤八月梓州江漲壞
閣道營舍又九月澶州河漲陷浮梁上因十六鄆州清
汶二水漲壞東阿縣民田 五年五月京師連旬雨不
止潁州潁水溢壞堤及民舍徐州白溝河溢入州城七
月復州江水漲毀民舍隄塘皆壞 六年河中府河漲
陷連堤溢入城壞軍營七所民舍百餘區鄜延寧州並

三河水漲溢入州城鄜州壞軍營延州壞倉庫軍民廬舍千六百區寧州壞州城五百餘堵軍營神祠民舍五百二十區 七年三月京兆府渭水漲壞浮梁溺者五十四人耀密博衛常潤州水害禾稼六月均州湏水均水漢江並漲壞民居人畜死者甚衆漢陽軍江水漲五丈餘七月大名府御河漲壞范濟口南劔州江州水漲壞居人廬舍一百四十餘區京兆府咸陽縣渭水漲壞浮梁工人溺死五十四人九月梧州江水漲三丈入城

壞倉廩及民廬舍又十月河決懷州武陟縣害民田

八年五月河大決滑州房邨徑澶濮曹濟諸州浸民田
壞居人廬舍東南流入淮六月陝州河水漲壞浮梁又
永定澗水漲壞民舍軍營千餘區河南府澍雨洛水漲
五丈餘壞鞏縣官署軍營民舍殆盡穀洛伊瀍四水暴
漲壞京城官署軍營寺觀祠廟民舍萬餘區溺死者以
萬計又壞河清縣豐饒務倉庫軍營民舍千餘區夔州
江水漲七尺七月祚州資河漲溢入城壞軍營民舍百

餘區雄州易水漲一丈三尺壞民廬鄜州河水漲溢入
城壞官寺民舍四百餘區荊門軍長林縣山水暴漲壞
民居舍五十一區凡五十六人溺死八月徐州清河水
漲丈七尺溢出堤塞州三面門以禦之九月宿州睢水
漲汎民舍六十里是夏及秋開封浚儀酸棗陽武封邱
長垣中牟尉氏襄邑雍邱等縣河水害田 九年七月
嘉州江水暴漲壞官署民舍溺死者千餘人又八月延
州南北兩河漲溢入東西兩城壞官寺民舍淄州霖雨

孝婦河漲溢壞官寺民舍漂溺人畜澶州河漲壞民田
孟州河漲斷浮梁損民田雅州江水漲九丈壞民廬舍
新州江漲入南寨壞軍營 雍熙二年七月朗州江溢
害稼 三年六月壽州大水 端拱元年五月英州江
水漲五丈餘壞民田及廬舍數百區七月磁州漳滏二
水漲 淳化元年六月吉州大雨江漲丈三尺漂壞民
田廬舍蘄州黃梅縣堀口湖水漲壞民田廬舍都盡江
州江水漲二丈八尺七月洪州江水漲壞州城三十堵

及民廬舍二千餘區漂二千餘戶秦州隴城縣大雨壞
官私廬舍殆盡溺死者百三十七人 二年四月京兆
府河水漲壞咸陽縣浮梁漂艦十七六月乙酉汴水溢
於浚儀縣壞連隄浸民田上親臨視督衛士塞之辛卯
又決於宋州宋城縣博州大霖雨河漲溢壞民廬舍八
百七十區亳州河水溢東流汎民田壞廬舍七月齊州
明水漲壞黎濟寨城百餘堵許州沙河溢雄州唐河水
漲害民田殆盡嘉州江漲丈八尺溢入州城毀民舍復

州蜀漢二江水漲壞民田廬舍九月邛州蒲江等縣山水暴漲壞民舍七十區死者七十九人是秋荆南北路江水注溢浸田畝甚衆三年七月河南府洛水漲壞七里鎮國二橋又山水暴漲壞豐饒務官舍民居溺死者二百四十人十月商州上津縣大雨河水溢壞民舍溺者三十七人四年六月隴城縣大雨牛頭河漲二十丈沒溺居人廬舍七月京師大雨十晝夜不止朱雒崇明門外積水尤甚軍營廬舍多壞九月澶州河水漲

衝陷北城壞居民廬舍官署倉庫殆盡民溺死者甚衆
梓州元武縣涪江漲二丈五尺壅決流入州城壞官私
廬舍萬餘區溺死者甚衆是秋陳頴宋亳許蔡徐濮澶
博州霖雨秋稼多敗十月澶州河決西北流入御河浸
大名府城知州趙昌言壅城門禦之五年秋開封府
宋亳陳頴泗壽鄧州雨水害稼至道元年四月甲辰
京師大雨雷電道上水數尺二年六月河南府瀍澗
洛三水漲壞鎮國橋七月建州溪水漲溢入州城內壞

倉庫民舍萬餘區鄆州河水漲壞連堤四處宋州河決穀熟縣閏七月陝州河漲漂大樹壞浮梁失連艦是月廣南諸州並雨水真宗咸平元年正月昭州雨霖害民田溺死者百五十七人齊州清黃河汎溢壞田廬

二年十月潭州山水汎溢壞民舍千餘區民黃拏等十家俱溺死三年三月梓州江水漲壞民田五月河決鄆州王陵埽七月洋州漢水溢民多有溺死者四年七月同州澇谷水溢夏陽縣民溺死者數十人五年

二月雄霸瀛深滄州乾寧軍水溢害民田六月京師大雨漂壞廬舍民有壓死者積潦浸道路自朱雀門東抵宣化門尤甚皆注惠民河河復漲溢軍營多壞景德元年九月宋州汴水決浸民田壞廬舍河決澶州橫隴埽等二年六月寧州山水汎溢壞民舍軍營多溺死者三年七月應天府汴水決南注亳州合浪宕渠東入於淮四年五月鄭州索水漲高四丈許漂滎陽縣居民四十二戶有溺死者六月鄧州江水暴漲南劔州

山水汎溢漂溺居人七月河溢澶州壞王八埽 大中

祥符元年六月開封府尉氏縣惠民河決 二年七月

徐濟淄青州大水八月無為軍大風雨拔木壞城門營

壘民舍壓溺千餘人鳳州大水漂溺居民十月兗州霖

雨害稼京畿惠民河決壞民田 三年五月辛丑京師

大雨平地數尺壞軍營民舍多壓死者近畿積潦六月

吉州臨江軍並江水汎溢害民田九月河決河中府白

浮圖村 四年七月江洪筠袁州江漲害民田壞州城

八月河決通利軍大名府御河水溢合流壞府城害民
田人多溺死者九月河溢於孟州溫縣蘇州吳江汎溢
壞民廬舍十一月楚秦州潮水害田民多溺死 五年
正月河決棣州聶家口七月慶州淮安鎮山水暴漲漂
溺居民 六年六月保安軍積雨河溢浸城壘壞廬舍
判官趙震溺死又兵民溺者凡六百五十人 七年六
月泗州水溢害民田河南府洛水漲秦州定西寨山水
暴漲有溺死者八月河決澶州十月濱州河溢於安定

鎮 九年六月秦州獨孤谷水漲壞長道縣鹽官鎮城
橋及官廨民舍共二百九十五區溺死者六十七人七
月延州洎定平安遠寨門栲栳四寨山水汎溢壞隄城
九月雄霸州界河汎溢利州水漂棧閣萬一千八百間
天禧五年六月河決滑州城西南漂沒公私廬舍死
者甚衆歷澶濮鄆濟單至徐州與清河合浸城壁不沒
者四版明年既塞六月復決於西北隅

文獻通考卷二百九十六

欽定四庫全書

史部

文獻通考卷二百九十八

詳校官內閣學士_臣瑤保

編修_臣程嘉謨覆勘

覆校官中書_臣孫希旦

校對官中書_臣金光悌

謄錄舉人_臣龐兆懋

謄錄貢生_臣金拱閭

欽定四庫全書

文獻通考卷二百九十七

鄱陽馬端臨貴與著

物異考三

水災

仁宗乾興元年蘇湖秀水壞民田是歲十月京東淮南
水災天聖四年六月建州邵武軍大水壞廬舍溺人
庚寅京師及河南府鄭州大水九月京東江淮兩浙福

建諸州軍雨水壞民廬舍是歲汴水決溢 六年七月
江寧府揚真潤三州江水溢壞廬舍雄霸州大水八月
永興軍山水暴漲溺死居民是月河決楚王埽 七年
六月河北大水 明道二年京師水壞軍營府庫 景
祐元年泗州淮汴溢七月澶州河決橫隴埽 三年虔
吉等州水 四年六月杭州江潮溢壞堤千餘丈八月
越州大水漂溺居民 寶元元年建州水 康定元年
滑州河溢 慶歷八年六月河決澶州商胡埽是歲河

北大水 皇祐元年二月河北黃御二河並決注於乾
寧軍河朔頻年水災 二年鎮定復大水並邊尤被其
害 三年七月河決大名府館陶縣郭固口 嘉祐元
年六月京師及京東西河北水潦害民田雨壞社稷壇
及官私廬舍數萬區域中繫棧渡人七月京東西荆湖
北路水災淮水自夏秋暴漲環浸泗州城是歲諸路江
河決溢河北尤甚民多流亡 六年淮水溢 英宗治
平元年京師許蔡陳潁唐泗濠楚廬壽杭宣鄂洪施渝

州光化軍俱有水災 二年八月庚寅京師大雨地上
涌水壞廬舍漂人畜 神宗熙寧元年秋霸州山水漲
溢保定軍大水害稼壞官私廬舍城壁漂溺居民河決
恩冀州漂溺居民 二年八月河決滄州饒安漂溺居
民移縣治於張為村泉州大風雨水與潮相衝泛溢損
田稼官私廬舍 四年八月金州大水毀城壞官私廬
舍 七年六月熙州大雨洮河汎溢陝州大雨漂溺陝
平陸二縣 八年四月潭衡邵道州江水溢壞官私廬

舍 九年七月太原府汾河夏秋霖雨水大漲十月潮
州海陽潮陽二縣海潮漲溢壞廬舍溺居民 十年七
月河決曹村下埽澶淵絕流河南徙又東匯於梁山張
澤灤凡壞郡縣四十五官亭民舍數萬田三十萬頃洺
州漳河決注城大雨水二丈河陽河水湍漲壞南倉溺
居民 元豐元年齊州章邱河水溢壞公私廬舍城壁
漂溺居民舒州山水暴漲浸官私廬舍 四年四月澶
州臨河縣小吳河溢北流漂溺居民五月淮水泛漲七

月泰州海風駕大雨漂浸州城壞公私舍數千楹 七
年七月河北東西路北京館陶河溢水入府城壞官私
廬舍八月趙邢洺磁相州河水汎溢壞城郭軍營是年
相州漳河決溺臨漳縣居民懷州黃沁河泛溢大雨水
損稼壞廬舍城壁磁州諸縣鎮夏秋漳滏河水汎溢相
州臨漳縣斛律口決壞官私廬舍傷田稼損居民 哲
宗元祐八年京畿京東西淮南河北諸路大水 紹聖
元年京畿曹濮陳蔡等州水害稼 元符元年河北京

東等路大水 二年六月陝西京西河北大水河溢流

漂人民廬舍 徽宗崇寧元年京城水壞廬舍溺人

大觀元年夏京畿大水詔工部都水監疏導至於八角

鎮河北京西河溢漂溺民戶十月蘇湖水災 二年秋

黃河決陷沒邢州鉅鹿縣 三年七月階州久雨江溢

四年夏鄧州大水漂沒順陽縣 政和五年六月江

寧府太平宣州水災八月蘇湖常秀等諸郡水災 七

年瀛滄州河水決滄州城不沒者三板民死百餘萬

八年夏江淮荆浙諸路大水民流移漂溺者衆分遣使
者賑濟發運使任諒坐不奏泗州壞官私廬舍等勒停
宣和元年五月大雨水驟高十丈餘犯都城自西北
牟駝岡連萬勝門外馬監居民盡沒前數日城中井皆
渾宣和殿後井水溢盖水信也至是詔都水使者決西
城索河隄殺其勢城南居民冢墓俱被浸遂壞籍田親
耕之稼水至益猛直冒安上南薰諸門城守凡半月已
而入汴汴渠將溢於是募人決下流由城北入五丈河

下通梁山灤乃平十一月東南州縣水災 高宗紹興
二年閏四月徽嚴州水害稼 三年七月丙子泉州水
壞城郭廬舍 五年秋西川郡國水 六年冬饒州雨
水壞城四百六十餘丈 十六年潼川府東南江湓水
入城浸民廬 十八年八月越明婺州水 二十八年
六月興利二州大安軍大水流民廬壞橋棧死者甚衆
九月江東淮南數郡水浙東西沿江海郡縣大風水平
江紹興湖常秀潤為甚 三十年五月畿縣於潛臨安

湖州安吉等三縣山水暴出漂民廬壞田桑人溺死甚衆三十二年四月淮水溢數百里漂民田廬死者甚衆六月浙西郡縣山湧暴水漂民室壞田覆舟孝宗隆興元年八月浙東西州縣大風水越蘇湖及崇德縣為甚二年七月蘇湖常秀潤昇宣池太平廣德廬和光壽春無為及淮東郡皆大水浸城郭壞廬舍圩田軍壘舟行廛市累日人溺死甚衆越月積陰苦雨水患益甚乾道元年六月常湖水壞圩田二年八月温州

大風海濤流溢沿江民廬鹽場覆舟溺死者二萬餘人
江濱皆斃尚七千餘人 三年六月廬舒蘄州水壞苗
稼漂人畜七月臨安府天目山湧暴水決臨安縣五鄉
民廬二百八十餘家人多溺死八月上虞縣湖秀州水
壞民田廬時積潦至於九月禾稼皆腐江東水溢於山
江西隆興四縣為甚 四年七月衢州大水敗城三百
餘丈漂民廬孳牧壞禾稼江陵建寧紹興饒信皆水
五年夏秋溫台凡三大風水漂民廬壞稼溺人甚衆黃

巖縣為甚 六年五月蘇昇宣溫湖秀太平廣德大水
城市有深丈餘者江西亦大水 八年五月吉筠臨江
隆興皆大水六月四川郡縣大水嘉眉邛蜀永康金堂
尤甚 九年五月嚴吉饒信池太平建康隆興廣德軍
水漂民居壞圩田分水縣沙塞四百餘畝六月湖北郡
縣水 淳熙元年七月錢塘大風濤決臨安府江堤一
千六百六十餘丈漂民居六百三十餘家 三年八月
台州大風雨海濤溪流合激為大水決江岸壞民廬溺

人是月行都及浙東西江東郡邑多水 四年五月建
寧福南劔大雨水漂民廬數千家錢塘江濤大溢敗堤
一百八十餘丈明州瀕海風濤敗堤漂沒民田九月大
風雨駕海濤錢塘餘姚上虞定海鄞縣敗堤溺人 五
年六月階州水壞城郭福州興化俱大水 六年夏秋
衢溫台湖秀太平寧國水壞圩田溺人 八年五月嚴
州紹興府大水流民舍敗堤岸腐禾稼徽江州亦水
十年五月信州襄陽及江東西浙東數郡水秋台州水

八月雷州大風激海濤沒瀕海民舍溺人九月福漳州
大風雨水暴至瀕海聚落廬舍人舟皆流入海漳城半
沒十一年四月和州水五月階州白江水溢壞隄及
民舍溺人七月明州大風雨山水暴至浸城覆舟殺人
十二年六月婺州水是歲鄂州水浸民廬自夏徂冬
乃退十四年汀州水十五年五月淮甸大雨水淮
水溢廬濠楚無為安豐高郵盱眙軍皆漂民室壞田稼
荆江溢鄂州大水漂民室三千餘家復岳澧江陵常德

德安漢陽皆水至六月建寧隆興袁撫臨江皆水圯民
廬十六年五月沅靖州山水溢沿江下辰州常德府
城沒一丈五尺漂民廬舍六月鎮江潼川俱水溢壞民
廬及田光宗紹熙二年五月建寧水福州水浸城屬
縣漂沒民廬利州潼川嘉陵興州綿果合金龍漢崇慶
懷安石泉大安俱有水患民溺死甚衆三年五月常
德雨水浸民田廬徽宣池廣德皆水七月台州襄陽江
陵荆門復州俱水鎮江水損稼四年安豐紹興寧國

廣德筠州水害稼興國贛州江州江陵皆水七月臨江
隆興吉州水圯民廬自夏及秋江西九州三十七縣皆
水興化風激海濤沒田廬 五年五月池州寧國太平
紹興皆水八月行都及明台溫嚴常平江鎮江寧國江陰
常德皆水 寧宗慶元元年六月台州諸縣大風雨山
洪濤並作沒田廬無算 二年秋浙東郡國大水 三
年九月紹興婺州水害稼 五年秋台溫衢婺水漂廬
溺人 六年五月嚴衢婺饒信徽南劍建寧及江西郡

國皆大水自庚午至甲戌漂民廬害稼 嘉泰二年七月汀州建寧福州南劍及江西郡邑水害苗稼 開禧元年九月淮漢水溢荆襄 二年五月婺州東陽山崩洪漂聚落五百四十餘所湮田二萬餘頃 三年江浙淮郡縣水鄂漢尤甚 嘉定二年六月西和利州成州閬州遂寧皆水七月台州海濤流圯民廬溺人 三年四月嚴衢婺徽大水行都水浸民廬西湖溢瀕湖民居皆圯 五年五月嚴州台州水 六年六月嚴州及臨

安紹興湖州屬縣皆水 九年五月行都及紹興嚴衢

婺台處信饒福漳泉興化十二郡大水漂田廬害稼

十年冬浙江濤溢圯瀕江廬舍覆舟溺人蜀漢二州大

江沒城郭 十二年畿縣鹽官海失故道潮汐衝平野

三十餘里至是侵縣治鹽場多圯 十五年七月紹興

水衢婺徽嚴暴流與江濤合圯田廬害稼 十六年五

月江淮浙荆蜀郡縣水蘇湖常秀池鄂楚太平廣德為

甚鄂州江湖合漲城市沉沒累月不洩是秋江濤溢圯

沿江民廬畿縣及福漳泉興化大水壞田稼十五六
十七年五月福建大水建寧南劍尤甚建昌大水圯民
廬城郭敗稼

水異

此即前史五行志所謂火沴水也世以河清為祥
而水變赤為妖其為水異一也故並載於此

史記魯襄公二十三年穀洛水鬪將毀王宮劉向以為
近火沴水也周靈王將壅之有司諫曰不可長民者不

崇藪不墮山不防川不竇澤

竇穴也

今吾執政毋乃有所

辟

邪辟也

而滑夫二川之神

滑亂也

使至於爭明

明水道也

以防

王宮室王而飾之毋乃不可乎

言為欲防固王宮使水不得毀故過飾二川

懼及子孫王室愈卑王卒壅之以傳推之以四瀆比諸

侯穀洛其次卿大夫之象也為卿大夫將分爭以危亂

王室也後數年有如日者五是歲早霜靈王崩景王立

二年儋括欲殺王而立王弟佞夫佞夫不知景王并誅

佞夫及景王死五大夫爭權或立子猛或立子朝王室

大亂京房易傳曰天子弱諸侯力政厥異水鬪 考王
二年河水赤於晉龍門三日

秦武王三年渭水赤者三日昭王三十四年渭水又赤
三日劉向以為近火沴水也秦連相坐之法棄灰於道
者黥網密而刑虐加以武伐橫出殘賊鄰國至於變亂
五行氣色謬亂天戒若曰勿為刻急將致敗亡昔三代
居三河河洛出圖書秦居渭陽而渭水數赤瑞異應德
之效也京房易傳曰君湎於酒淫於色賢者潛國家危

厥異流水赤也

後漢光武二十四年六月丙申沛國睢水逆流一日一

夜止 安帝永初六年河東池水變色皆赤如血

水變占曰

水化為血者好任殘賊殺戮 時鄧太后猶專政 元初

不幸延及親戚水當為血

二年潁州襄城臨水化為血京房占曰水化為血兵且

起 桓帝延熹八年四月濟陰東郡濟北河水清

襄楷說見

水災門

靈帝建寧四年二月河水清

致堂胡氏曰水性潤下而質不同或清或濁或輕

或重或弱或悍或黑或白或寒或溫或甘或澹是其質也若大河之質則黃濁數千里而不可澄汰者也凡物反常為妖濁而忽清猶地而出堆阜山而沸泉湧非所當有變異之象也故襄楷言自古未有河清者後世乃以為大慶君臣動色載於年號著於邑名形於歌詠紀於史牒不亦異乎至若大海朝宗衆流自非並岸風水激薄沙泥渾汙之處則萬里渟滢未嘗濁也而佞人諂媚又有以海

清為賀者不亦異之甚乎

晉武帝太康五年六月任城魯國池水皆赤如血按劉
向說近火沴水聽之不聰之罰也 穆帝升平三年二
月涼州城東池中有火 四年四月姑臧澤水中又有
火此火沴水之妖也明年張天錫殺中護軍張邕邕執
政之人也 安帝元興二年十月錢塘臨平湖水赤桓
元諷吳郡使言開除以為已瑞俄而元敗

苻堅時長安有水影遠觀若水視地則見人至堅晚

年而止

宋文帝元嘉二十四年夏四月河濟俱清 二十五年
冬青州城南遠望見地中如水有影謂之地鏡 孝武
孝建五年河濟清

齊東昏侯永元元年七月辛未淮水變赤如血

陳宣帝大建十四年七月

時後主
已即位

江水赤如血自建康

西至荊州

後主禎明中江水赤自方州東至海洪範

五行傳曰火沴水也法嚴刑酷傷水性也五行變節陰

陽相干氣色繆亂皆敗亂之象也京房易占曰水化為血兵且起其後為隋所滅 禎明二年四月郢州南浦水黑如雲黑水在關中而今淮南水黑荊揚之地陷於關中之應

後齊武成河清元年四月河濟清襄楷曰河諸侯象濁反清諸侯將為天子之象後十餘載隋有天下

後周靜帝大象元年六月咸陽池水變血與大建十四年同占是時刑罰嚴急未幾國亡

隋煬帝大業三年武陽郡河清數里鏡徹十二年龍
門又河清後二歲唐受禪

唐高祖武德元年七月新豐鸛鵒谷水清世傳此水清
天下平開皇初暫清復濁至是復清七年閏七月長
安古城鹽渠水生鹽色紅而味甘狀似方印九年二
月蒲州河清襄楷以為河諸侯象清陽明之效也太

宗貞觀十四年二月陝州泰州河清十六年正月懷
州河清十七年十二月鄭州滑州河清二十三年

四月靈州河清 高宗永徽元年正月濟州河清 二

年十二月衛州河清 五年六月濟州河清十六里

調露二年夏豐州河清 武后時來俊臣井水變赤如

血井中常有吁嗟聲 長安初醴泉坊太平公主第井

水溢流又并州文水縣猷水竭武氏井溢 長安中晉

州祠水赤如血 中宗神龍二年二月壬子洛陽城東

七里地色如水樹木車馬歷歷見影漸移至都月餘乃

滅長安街中往往見水影昔苻堅之將死也長安嘗有

是景龍四年三月庚申京師井水溢占曰君凶又曰
兵將起元宗開元二十二年八月清夷軍黃帝祠古
井湧浪二十五年五月淄州棣州河清二十九年
亳州老子祠九井洄復湧肅宗乾元二年七月嵐州
合河關河三十里清如井水四日而變寶應元年九
月甲午泰州至陝州二百餘里河清澄澈見底代宗
大歷末深州東鹿縣中有水影長七八尺遙望見人馬
往來如在水中及至前則不見水德宗建中四年五

月乙巳滑州濮州河清 十四年閏五月乙丑滑州河清 貞元四年自陝至河陰河水黑流入汴至汴州城一宿而復 十七年福州劔池水赤如血 二十一年夏越州鏡湖竭是歲朗州熊武五溪水鬪占曰山崩川竭國必亡又曰方伯力政厥異水鬪 穆宗長慶元年七月河水赤三日止九月靈州奏黃河清從陝至定遠界二百五十里見底 文宗開成二年夏旱揚州運河竭 宣宗大中八年正月陝州河清 懿宗咸通七年

鄭州永福湖水赤如凝血者三日 八年七月泗水下
邳雨湯殺鳥雀水沸於火則可以傷物近火沴水也雨
者自上而降鳥雀民象 僖宗光啟元年正月潤州江
水赤凡數日 中和三年秋汴水入於淮水鬪壞船數
艘 廣明元年汝州峴陽峰龍池涸近川竭也

宋真宗咸平元年五月撫州王羲之墨池水色變黑如
雲 大中祥符元年五月丁丑泰山王母池水變紅紫
色 四年二月己未河中府寶鼎縣漢泉有光如燭焰

四五炬其聲如雷郭璞注爾雅曰河東汾陰縣有水口如車輪許噴沸涌出其深無限名之為漢即此也泉本八眼其一尤沸猛上祀后土畢臨觀之七眼皆湧此獨澄然若鑑詔賜泉北五龍廟曰神淵三年八月解州鹽池紫泉場水次二十許里不種自生其味特嘉命屯田員外郎何敏中往祭池廟八月東池水自成鹽僅半池潔白成塊晶瑩異常祀汾陰經度制置使陳堯叟繼獻凡四千七百分賜近臣及諸軍列校神宗元豐

四年十月環州河水變甘 徽宗大觀元年八月乾寧
軍河清 二年十二月陝州河清同州韓城縣邵陽縣
至清及百里涉春不變自是迄政和宣和諸路數奏河
清輒遣郎官致祭宰臣等率百官拜表賀歲以為常

高宗紹興十四年五月饒州樂平縣何衝里田隴數十
百頃當霽天無雲田水如為物所吸聚為一直西行高
平地數尺不假隄防而水自行里南程氏家井水溢亦
高數尺夭矯如長虹聲如雷穿牆毀樓二水鬪於杉墩

且前且却約十刻乃解各反故壑與史記周穀洛水鬪同占京房曰天子弱諸侯力政厥異水鬪

醴泉

漢宣帝甘露二年詔曰醴泉滂流枯槁榮茂救天下後漢光武中元元年夏京師醴泉涌出飲之者痼疾皆愈惟眇蹇者不瘳 明帝永平十一年醴泉出

隋文帝開皇二年京師承明里醴泉出

唐元宗天寶三年三月武威郡奏番禾縣嘉瑞鄉天寶

山有醴泉湧出 僖宗文德元年九月雲韶殿前穿井
得甘泉

宋太宗雍熙二年五月鳳翔府言岐山縣有泉耆舊相
傳時平則流世亂則竭自唐室中葉此泉遂竭至大中
年復流觀察使崔珙奏之詔書褒美賜號潤德泉碑刻
猶在自後復竭今忽涌溢別出細泉數派畫圖以聞

真宗大中祥符元年二月醴泉出蔡州汝陽縣鳳源鄉
有疾者飲之皆愈又相州永安縣韓陵山牧童埒地得

泉深尺餘汲取不竭飲者宿疾皆愈時或愆雨禱之必應四月丁巳兗州乾封縣民王用田中有童兒培土得小青錢數十爭取之錢墜石罅因發石有湧泉二十四眼味極甘美又枯石河復有湧泉二十五眼又一眼出曾阜之上信宿勢加倍又別引數派雙魚躍其中有果實流出似李而小味甚甘及今古錢百餘封禪經度制置使王欽若貯水馳驛以獻分賜近臣詔設欄格謹護之六月詔建亭以靈液為額 天禧二年閏四月京師

拱聖第十九營有湧泉疾癘者飲之皆愈詔建道觀名曰祥源神宗熙寧元年五月京師開化坊醴泉出徽宗政和五年正月河陽陽臺觀醴泉出

黑眚黑祥

王莽地皇元年二月壬申日正黑莽惡之

後漢靈帝光和元年六月丁丑有黑氣墮所御溫德殿

庭中

東觀記曰墮所御溫德殿庭中如車蓋隆起奮迅五色有頭體長十餘丈形貌似龍

晉懷帝永嘉五年十二月黑氣四塞近黑祥也帝尋淪

陷王室邱墟是其應也 愍帝建興二年正月己巳朔
黑霧著人如墨連夜五日乃止此近黑祥也其四年帝
降劉曜 元帝永昌元年十月京師大霧黑氣蔽天日
月無光十一月帝崩

宋文帝元嘉三十年正月乙亥朔會羣臣於太極前殿
有青黑氣從東南來覆映宮上二月甲子元凶劬弒逆
梁元帝承聖三年六月有黑氣如龍見於殿內近黑祥
也黑周所尚色今見於殿內周師入梁之象其年為周

所滅帝遇害

陳宣帝大建五年六月西北有黑雲屬地散如猪者十餘洪範五行傳曰當有兵起西北時後周將王軌軍於呂梁明年擒吳明徹軍皆覆沒

唐代宗大歷二年十月戊戌黑氣如塵彌漫於北方黑氣陰沴也德宗貞元四年七月自陝至河陰河水黑流入汴至汴州城下一宿而復近黑祥也占曰法嚴刑酷傷水性也五行變節陰陽相干氣色繆亂皆敗亂之

象十四年潤州有黑氣如隄自海門山橫亘江中與北固山峙又有白氣如虹自金山出與黑氣交將旦而沒宣宗大中四年正月壬寅黑氣如帶東西際天

懿宗咸通十四年七月僖宗即位是月黑氣如盤自天屬含元殿庭

宋元豐末嘗有物大如席夜見寢殿上而神宗登遐元符末又數見而哲宗山陵至大觀間漸晝見政和元年以後大作每得人語聲則出先若列屋摧倒之聲其形

僅丈餘髮髻如龜金眼行動硜硜有聲黑氣蒙之不大
了了氣之所及腥血四灑兵刃皆不能施又或變人形
亦或為驢自春歷夏晝夜出無時遇冬則罕見多在掖
庭宮人所居之地亦嘗及內殿後習以為常人亦不大
怖宣和末寢少出而亂遂作 徽宗政和三年夏至宰
臣何執中奉祠北郊有黑氣數丈出齋宮行一里許入
壇壝繞祭所皆近人穿燈燭而過俄又及於壇禮將畢
忽不見 徽宗宣和二三年春夏之際洛陽府畿間忽

有物如人或蹲踞如犬其色正黑不辨眉目始夜則出掠小兒傷食之後雖白晝入人家為惡所至喧然不安謂之黑漢有力者夜執槍棒自衛亦有託以作禍者如此二歲乃熄已而北征事起其後卒成播遷之禍高宗建炎三年二月甲寅日初出兩黑氣如人形夾日旁至巳時初刻乃散黑氣陰沴也亦兵象孝宗乾道四年春舒州雨黑米堅如鐵破之米心通黑淳熙十一年十二月戊辰夜畿縣新城深浦天雨黑水終夕盈眵

十六年六月京城錢塘門旦啟黑風入揚沙石塗人
驚避 寧宗慶元元年徽州黃山民家古井風雨之夕
黑氣出其中波浪噴涌皆黑祥也

文獻通考卷二百九十七

欽定四庫全書

文獻通考卷二百九十八

鄱陽馬端臨貴與著

物異考四

火災

春秋桓公十四年八月壬申御廩災董仲舒以為先是四國共伐魯魯君臣內怠政事外侮四鄰非能保守宗廟終其天年者也劉向以為御廩夫人八妾所舂米之

藏以奉宗廟時夫人有淫行

通於齊侯

挾逆心

欲弑桓公

天戒若

曰夫人不可以奉宗廟

莊公二十年齊火災劉向以

為齊桓好色以妾為妻嫡庶屢更故致火災

僖公二

十年五月乙巳西宮災董仲舒以為僖娶於楚而齊媵

之脅公立為夫人西宮小寢夫人所居也若曰妾何為

居此宮誅去之意也 宣公十六年成周宣榭火榭所

以藏樂器宣其名也董仲舒劉向以為十五年王札子

殺召伯毛伯天子不能誅天戒若曰不能行政令何以

禮樂為而藏之 成公三年二月甲子新宮災穀梁以

為宣宮一曰宣公弑子赤而立不當列於羣祖故天災

其廟 襄公九年春宋災晉侯聞之問士弱曰宋災於

是乎知有天道何故對曰古之火正或食於心或食於

味以出入火

師古曰味音竹救反

是故味為鶉火心為大火陶唐

氏之火正閼伯居商邱祀大火而火紀時焉相土因之

故商主大火商人閱其禍敗之釁必始於火是以知有

天道公曰可必乎對曰在道國亂亡象不可知也

韋昭曰大

亂之君天不復告故無象說曰古之火正謂火官也掌祭火星行火

政季春昏心星出東方而味七星鳥首正在南方則用

火季秋星入則止火以順天時救民疾帝嚳則有祝融

堯時有關伯民賴其德死則以為火祖配祭火星故曰

或食於心或食於味也相土商祖契之曾孫

師古曰契讀曰僕音

先列反字或作禹其用同耳據諸典籍相土即禹之孫今云曾孫未詳其意

代關伯後主火

星宋其後也世司其占故先知火賢君見變能脩道以

除凶亂君亡象天不譴告故不可必也 三十年五月

甲午宋災劉向以為先是宋公聽讒而殺太子痤應火不災上之罰也 昭公六年六月丙戌鄭災是春三月

鄭人鑄刑書士文伯曰火見鄭其火乎火未出而作火

以鑄刑器藏爭辟焉

著刑於鼎故稱刑器
法設下爭故云爭辟

火而象之不

火何為說曰火星出於周五月而鄭以三月作火鑄鼎刻刑辟書以為民約是為刑器爭辟故火星出與五行之火爭明為災其象然也又棄灋律之占也 九年夏

四月陳火時楚靈王滅陳鄭裨竈曰五年陳將復封封

五十二年而遂亡子產問其故對曰陳水屬也火水妃也而楚所相也今火出而火陳逐楚而建陳也妃以五成故曰五年歲五及鶉火而後陳卒亡楚克有之天之道也說曰顓頊以水王陳其族也

師古曰陳舜後也舜本出顓頊

今茲

歲在星紀後五年在大梁大梁昴也金為水宗得其宗而昌故曰五年陳將復封楚之先為火正故曰楚所相也天以一生水地以二生火天以三生木地以四生金天以五生土五位皆以五而合而陰陽易位故曰妃以

五成然則水之大數六火七木八金九土十故水以天
一為火二牡木以天三為土十牡土以天五為水六牡
火以天七為金四牡金以天九為木八牡陽奇為牡陰
耦為妃

師古曰奇音居宜反

故曰水火之牡也火水妃也於易坎

為水為中男離為火為中女蓋取諸此也自大梁四歲
而及鶉火四周四十八歲凡五及鶉火五十二年而陳
卒亡火盛水衰故曰天之道也哀公十七年七月己卯
楚滅陳 昭公十八年五月壬午宋衛陳鄭災董仲舒

以為象王室將亂天下莫救故災四國言亡四方也

定公二年五月雉門及兩觀災

師古曰雉門公宮南門也兩觀謂闕

董仲

舒劉向以為此皆奢僭過度者也先是季氏逐昭公昭

公死於外

師古曰謂死於乾侯

定公即位不能誅季氏又用其邪

說淫於女樂而退孔子

師古曰齊人歸女樂季桓子勸定公受之君臣相與觀之廢朝

禮三日孔子乃行

天戒若曰去高顯而奢僭者一曰門闕號令

所由出也今舍大聖而縱有罪亡以出號令矣京房易

傳曰君不思道厥妖火燒宮

哀公三年五月辛卯桓

釐宮災董仲舒劉向以為此二宮不當立違禮者也哀公又以季氏之故不用孔子孔子在陳聞魯災曰其桓釐之宮乎以為桓季氏之所出釐使季氏世卿者也

四年六月辛丑亳社火

師古曰亳社殷社也

董仲舒劉向以為亡

國之社所以為戒也

師古曰存其社者欲使君常思敬慎懼危亡者也

天戒若

曰國將危亡不用戒矣春秋火災屢於定哀之間不用聖人而縱驕臣將以亡國不明甚也一曰天生孔子非為定哀也蓋失禮不明火災應之自然象也

漢惠帝四年十月乙亥未央宮凌室災

藏冰之室

丙子織室災

織作之室

劉向以為太后立魯元公主女為皇后凌室所以供

養飲食織室所以奉宗廟衣服與春秋御廩同又天戒若曰皇后亡奉宗廟之德將絕祭祀其後帝崩后亡子取后宮美人子立之呂后崩諸呂為亂大臣誅之而立文帝惠后幽廢高后元年五月丙申趙叢臺災劉向以為時呂氏女為趙王后嫉妬將為讒口以害趙王王不悟卒見憂死文帝七年六月癸酉未央宮東闕罌罌災

師古曰罌罌謂連闕

曲閣也以覆重刻垣墉之處其形罍然
一曰屏也罍音浮闕與其兩傍俱災也

劉向以為東闕

所以朝諸侯之門也罍恩在其外諸侯之象也漢封諸侯
王連城數十賈誼等以為違古制度必將叛逆先是淮南
濟北皆謀反其後七國舉兵而誅 景帝中五年八月己

酉未央宮東闕災時栗太子以罪廢自殺丞相周亞夫下
獄死 武帝建元六年六月丁酉遼東高廟災四月壬子
高園便殿火董仲舒對以春秋時亳社兩觀桓釐廟災四
者皆不當立天皆燔其不當立者以示魯今高廟不當居

遼東高園殿不當居陵旁於禮亦不當立與魯所災同

按古者諸侯不敢祖天子則高廟不當立於遼東也古者墓以藏體魄廟以宅神靈故祭於廟不祭於墓則高園殿不當居陵旁也二者皆失禮之事謂天燔其不當立者以示警猶之可也而仲舒所對累數百言至謂天災若語陛下視親戚貴屬在諸侯遠正最甚者忍而誅之如吾燔遼東高廟視近臣在國中處旁仄及貴而不正者忍而誅之如

吾燔高園殿大槩勸帝以多行殺戮而於郡國陵墓不當立廟之說略無所發明帝采其說而使仲舒弟子呂步舒治淮南獄深竟黨與坐死者甚衆蓋此對徒足以啟帝之忍心而略不能草漢之失禮矣故祇取其兩言而餘語則盡削之云

武帝太初元年十一月乙酉未央宮栢梁臺災先是大風發其屋夏侯始昌先言其災日後有江充巫蠱衛太子事昭帝元鳳元年燕城南門災劉向以為時燕王使邪臣

通於漢為讒賊謀逆亂南門者通漢道也 四年五月丁

丑孝文廟正殿災劉向以為是歲正月上加元服有明哲
之性而大將軍光久秉政不歸亡周公之德將為國害故
正月加元服五月而災見古之廟皆在城中孝文廟始出
居外天戒若曰去貴而不正者宣帝既立光猶秉政驕溢
過制妻顯弑后隨以誅滅 宣帝甘露元年四月丙申中
山太上皇廟災甲辰孝文廟災 元帝初元三年四月乙
未孝武園白鶴館災劉向以為先是前將軍蕭望之光祿

大夫周堪輔政為佞臣石顯許章等所譖望之自殺堪廢

黜明年白鶴館災園中五里馳逐走馬之館

五里者言周回五里

不

當在山陵昭穆之地天戒若曰去貴近逸遊不正之臣將
害忠良後章坐走馬上林下烽馳逐免官

夜於上林苑下舉火馳射也

永光四年六月甲戌孝宣杜陵園東闕南方災時上復
用周堪張猛等石顯終欲害之園陵小於朝廷闕在司馬
門中內臣顯之象也孝宣親而貴門闕法令所從出也天
戒若曰去法令內臣親而貴者必為國害後顯卒害猛

按魯哀公三年桓僖宮災左傳載孔子在陳聞火
曰其桓僖乎杜征南注以為桓僖親盡而廟不毀
故天示以災公羊傳之說亦然蓋踰禮制而以詔
瀆事神則神亦不享其祭故天降之災非曰桓僖
有以獲罪於天而火焚其廟也至仲舒劉向則謂
以季氏之故桓則季氏所出而僖則使季氏世卿
者於是以為其咎不在當時之君而歸過於祖宗
其說鑿矣至其論漢世以來之災異如高廟之火

以為為諸侯王大臣文廟之火以為為霍光宣廟之火以為為石顯夫諸侯王之過制霍光之專擅石顯之姦欺所以致之者時君之過也於先代何預且曰貴而不正者天燔之是天欲示警於子孫而焚其祖宗之廟蓋亦迂遠而不切矣況宗廟人主所嚴事者也災延宗廟變異不小不思側身脩行以謝天地祖宗而方且以驕恣專擅之臣擬之以為天惡而欲燔之以示戒其說不亦謬乎

成帝建始元年正月乙丑皇考廟災初宣帝為昭帝後而立父廟於禮不正又時大將軍王鳳擅朝將害國家故天見象 鴻嘉三年八月乙卯孝景廟北闕災十一月甲寅許皇后廢 永始元年正月癸丑大宮凌室災戊午后園南闕災時趙飛燕大幸許后既廢上將立之故天見象於凌室與惠帝四年同應又后起於微賤與趙氏同應天戒若曰微賤亡德之人不可以奉宗廟將絕祭祀 四年四月癸未長樂宮臨華殿及未央

宮東司馬門災六月甲午孝文霸陵園東闕南方災長樂宮成帝母王太后所居也未央帝所居也霸陵太宗盛德園也時太后三弟相續秉政舉宗居位充塞朝廷將害國家故天象仍見哀帝建平三年正月癸卯桂宮鴻寧殿災帝祖母傅太后所居也時傅太后欲與成帝母等號齊尊大臣以諫獲罪後三年帝崩傅氏誅滅平帝元始五年七月己亥高皇帝原廟殿門災盡時平帝幼王太后臨朝委政王莽將篡漢祚墮高帝宗廟

故天象見也

王莽地皇三年二月霸橋災數千人以水沃救不滅
後漢光武建武六年十二月雒陽市火 二十四年正
月戊子雷雨霹靂火災高廟北門 明帝永平元年六
月己亥桂陽火飛來燒城寺 章帝建初元年十二月
北宮火燒壽安殿延及右掖門 元和三年六月丙午
雷雨火燒北宮朱爵西闕 和帝永元八年十二月丁
巳南宮宣室殿火時帝幸北宮竇太后在南宮明年竇

太后崩 十三年八月己亥北宮盛饌門閤火時和帝
幸鄧貴人陰氏以罪廢死立鄧貴人為皇后 十五年
六月辛酉漢中城固南城門災此孝和皇帝將絕世之
象也其後二年帝崩殤帝及平原王皆早夭和帝世絕
安帝永初元年十二月河南郡縣火燒殺百五人

二年河南郡縣又失火燒五百八十四人四月甲寅漢
陽河陽城中失火燒殺三千五百七十人先是和帝崩
立殤帝復早夭平原王勝有廢疾乃更立清河王子是

為安帝 四年三月戊子杜陵園火 元初四年二月

壬戌武庫火燒兵物一百一十五種直千萬以上時羌
叛大發兵禦之積十餘年天下厭苦兵役 延光元年

八月戊子陽陵園寢殿災凡災發於先陵此太子將廢
之象也若曰不當廢太子以自翦如火不當害先陵之

寢也明年上以讒言廢皇太子為濟陰王後二年宮車
晏駕中黃門孫程等十九人起兵殿省誅賊臣立濟陰
王 四年秋七月乙丑漁陽城門樓災 順帝永建三

年七月丁酉茂陵園寢殿災

古今註曰二年五月戊辰守宮失火燒宮藏財物盡

四年河南郡縣失火燒人六畜

陽嘉元年恭陵廡災及東西幕府火

古今註曰十二月河南郡國火燒廬舍殺人

太尉李固以為奢僭所致陵之

初造禍及枯骨規廣治之尤節又上欲更造宮室益臺

觀故火起幕府燒材木

永和元年十月丁未承福殿

火

臣昭按楊厚傳是災

先是爵號阿母宋娥為山陽君后父梁商

本國侯又多益商封商子冀不襲父爵別封襄邑侯皆

過差非禮

漢安元年三月甲午雒陽劉漢等百九十

七家為火所燒

古今註曰火或從室屋間物中不知所從起數月乃止

後四年宮

車比三晏駕建和元年君位乃定

桓帝建和六年五

月癸丑北宮掖庭中德陽殿火及左掖門時梁冀挾姦

譖殺太尉杜喬是後梁太后崩梁氏誅滅 延熹四年

正月辛酉南宮嘉德殿火戊子丙署火二月壬辰武庫

火五月丁卯原陵長壽門火先是亳后因賤人得幸號

貴人為后上以后母宣為長安君封其兄弟受寵隆崇

又多封無功者去年春白馬令李雲坐直諫死至此等

除心尾火連作 五年正月壬午南宮丙署火四月乙

丑恭北陵東闕火戊辰虎賁掖門火五月康陵園寢火

甲申中藏府承祿署火七月己未南宮承善闥內火

六年四月辛亥康陵東署火七月甲申平陵園寢火

八年二月己酉南宮嘉德署黃龍千秋萬歲殿皆火四

月甲寅安陵園寢火閏月南宮長秋和歡殿後鉤盾掖

庭朔平署各火十一月壬子德陽前殿西閤及黃門北

寺火殺人

袁山松書曰是時連月有火災諸官寺或一日再三發又夜有訛言擊鼓相驚陳蕃劉志

茂上疏諫曰古之火皆君弱臣強極陰之變也前始春而獄刑慘故火不炎上前入春節連寒木冰暴風折樹又八九州郡並言隕霜殺菽春秋晉執季孫行父木為之冰夫氣弘則景星見化錯則五星開日月蝕災為已然異為方來恐卒有變必於三朝唯善政可以已之願察臣前言不棄愚忠則元元幸甚書奏不省 九

年三月癸巳京都夜有火光轉行民相驚譟

袁山松書曰是時宦

監專朝鈎黨事起上尋無嗣陳蕃實武為曹節等所害天下無復紀綱

靈帝熹平四年

五月延陵園災

光和四年閏月辛酉北宮東掖庭永

巷署災

陳蕃諫云楚女悲而西宮災不御宮女怨之所致也

五年五月庚申德

陽前殿西北入門內永樂太后宮署火 中平二年二

月己酉南宮雲臺災庚戌樂城門災

南宮中門

延及北闕道

西燒嘉德和歡殿案雲臺之災自上起棖題數百同時
並然若就縣華鐙其日燒盡延及白虎威興門尚書符
節蘭臺夫雲臺者乃周家之所造也圖書術籍珍玩寶
怪皆所藏在也京房易傳曰君不思道厥妖火燒宮是
時黃巾作惡七州二十八郡同時俱發百姓死傷過半
靈帝虐侈滋甚官非其人政以賄成天戒若曰放賢賞
淫何以舊典為故焚其臺門祕府也其後三年靈帝暴

崩繼以董卓之亂火三日不絕京都邱墟 獻帝初平

元年八月霸橋災其後三年董卓見殺

魏明帝太和五年五月清商殿災初帝為平原王納河
南虞氏為妃及即位不以為后更立典虞車工卒毛嘉
女為后后本仄微非所宜升以妾為妻之罰也 青龍

元年六月洛陽宮鞠室災 二年四月崇華殿災延於
南閣繕復之至三年七月此殿又災帝問高堂隆此何
咎也於禮寧有所禳之義乎對曰夫災變之發皆所以

明教誠也惟率禮脩德可以勝之易傳曰上不儉下不節孽火燒其室又曰君高其臺天火為災此人君苟飾宮室不知百姓空竭故天應之以旱火從高殿起也按舊占曰災火之發皆以臺榭宮室為誠今宜罷散作役務從節約清掃所災之處不敢於此有所營造蕤蒲上甲反下嘉禾必生此地以報陛下虔恭之德帝不從遂音甫復崇華殿改曰九龍以郡國前後言龍見者九故以為名多棄法度疲衆逞欲以妄為妻之應也

吳孫亮建興元年十二月武昌端門災改作端門又災
內殿門者號令所出殿者聽政之所時諸葛恪執政矜
慢放肆孫峻總禁旅險害終著恪喪衆殄人峻授政於
綝綝廢亮也 太平元年二月朔建業火時孫綝執政
矯詔殺呂據滕允明年又殺朱異棄法律逐功臣之罰
也 孫休永安五年二月城西門北樓災 六年十月
石頭小城火時嬖人張布專國多行無禮 孫皓建衡
二年三月大火燒萬家死者七百人時皓制令詭暴棄

法度誅名士後宮女謁盛行

晉武帝太康八年三月乙丑震災西閣楚王所止坊及臨商觀牕 十年四月癸丑崇賢殿災十月庚辰含章

鞠室脩成堂前廡景坊東屋暉章殿南閣火時有上書

曰漢王氏五侯兄弟迭任今楊氏三公並在大位故天

變屢見竊為陛下憂之由是楊珧音遙求退是時帝納馮

紂都敢反之間廢張華之功聽楊駿之讒離衛瓘之寵此

逐功臣之罰也明年宮車晏駕其後楚王承竊發之旨

戮害二公身亦不免震災其坊又天意乎 惠帝元康

五年閏月庚寅武庫火張華疑有亂先命固守然後救

火是以累代異寶玉莽頭孔子履

其逆反

漢高祖斷白蛇

劍及二百萬人器械一時蕩盡是後愍懷見殺太子之

罰也天戒若曰冢嗣將傾社稷將泯禁兵無所復施皇

旅又將誰衛帝后不悟終喪四海 八年十一月高原

陵火時賈后凶恣賈謐專朝惡罪宜見誅絕之應 永

興二年七月甲午尚書諸曹火起延崇禮闈及閣道夫

百揆主化之本王者棄法律之應也後清河王覃入嗣
不終於位又殺太子之罰也 孝懷帝永嘉四年十一
月襄陽火燒死者三千餘人時王如自號大將軍司雍
二州牧衆四五萬攻略郡縣此下陵上陽失其節之應
也 元帝太興中王敦鎮武昌武昌災火起興衆救之
於此而發於彼東西南北數十處俱應數日不絕舊說
所謂濫炎妄起雖興師衆不能救之之謂也干寶以為
此臣而君行亢陽失節是為王敦陵上有無君之心故

災也 永昌二年正月癸巳京都大火三月饒安東光
安陵三縣火燒七千餘家死者萬五千人 明帝太寧
元年正月京都火是時王敦威侮朝廷多行無禮內外
臣下咸懷怨毒極陰生陽也 成帝咸和二年五月京
師火 康帝建元元年七月庚申吳郡災 穆帝永和
五年六月震災石季龍太武殿及兩廟端門震災月餘
乃滅金石皆盡其後季龍死大亂遂滅亡 海西公太
和中郗愔為會稽太守六月大旱災火燒數千家延及

山陰倉米數百萬斛炎煙蔽天不可撲滅此亦桓溫強
盛將廢海西極陰生陽之應也 孝武帝寧康元年三
月京都風火大起是時桓溫入朝志在陵上少主踐位
人懷憂恐此與太寧火事同 太元十年正月國子學
生因風放火焚房百餘間是後考課不厲賞黜無章蓋
有育才之名而無收賢之實此不哲之罰先兆也 十
三年十二月乙未延賢堂災是月景申蝻斯則百堂及
客館驛騎府庫皆火於時朝多弊政衰陵日兆不哲之

罰皆有象類主相不悟終至亂亡會稽王道子寵幸尼

及妯

武酣反
老女稱

母各樹用其親戚乃至出入宮掖禮見人

主天戒若曰登延賢堂及客館者多非其人故災之也

又孝武帝更不立皇后寵幸微賤張夫人夫人驕妬皇

子不繁乖螽斯則百之道故災其殿焉道子復賞賜不

節故府庫被災斯亦其罰也 安帝隆安二年三月龍

舟二乘災是水沴火也其後桓元篡位帝乃播越天戒

若曰王者流遷不復御龍舟故災之耳 元興元年八

月庚子尚書下舍曹火時桓元遙錄尚書故天火示不復居也 三年盧循攻略廣州刺史吳隱之閉城固守其十月壬戌夜火起時百姓避寇盈滿城內隱之懼有應賊者但務嚴兵不先救火由是府舍焚蕩燒死者萬餘人因遂散潰悉為賊擒 義熙四年七月丁酉尚書殿中吏部曹火 九年京都大火燒數千家 十一年京都所在大行火災吳界尤甚火防甚峻猶日不絕王弘時為吳郡晝在聽事見天上有一赤物下狀如信幡

遙集路南人家屋上火即大發弘知天為之災故不罪
火主此帝室衰微之應也

宋文帝元嘉五年正月戊子都下大火 七年十二月
都下火延燒大社北墻 二十九年三月壬午都下火
齊東昏侯永元二年七月甲申宮內火惟東閣內明帝
舊殿數區及太極殿以南得存餘皆蕩盡

梁武帝天監元年五月有盜入南北掖燒神武門總章
觀時帝初即位而火燒觀闕不祥之甚既而太子薨皇

孫不得立及帝暮年惑於朱异之口果有侯景之亂宮
室多被焚燒天誠所以先見也 普通二年五月琬琰
殿火延燒後宮三千餘間 中大通元年朱雀航華表
災明年同泰寺災大同三年朱雀門災水沴火也時帝
崇尚佛道宗廟牲牷皆以麵代之又數詣寺捨身為奴
王公以下贖之天變數見而不悟後卒以亡

陳武帝永定三年重雲殿災

東魏孝靜天平二年十一月閭闔門災是時齊神武作

宰而大野拔斬樊子鵠以州來降神武聽讒而殺之司空元暉免逐功臣大臣之罰也 武定五年八月廣宗郡火燒數千家

後齊後主天統三年九龍殿災延燒西廊 四年昭陽宣光瑤華三殿災延燒龍舟是時讒言任用正士道消祖孝徵作歌謠斛律明月以誅死讒夫昌邪勝正之應也京房易傳曰君不思道厥妖火燒宮

隋文帝開皇十四年將祠泰山令使者致石象神祠之

所未至數里野火歟起燒像碎如小塊時帝頗信讒言
猜阻骨肉滕王瓚失志而死創業功臣多被夷滅故天
見變而帝不悟其後太子勇竟被廢戮煬帝大業十
二年顯陽門災舊名廣陽則帝之姓名國門之崇顯號
令之所由出也時帝不遵法度驕奢荒怠信讒害忠天
意若曰害廣陽也

唐太宗貞觀四年正月癸巳武德殿北院火 二十三
年三月甲午庫火 高宗永徽五年十二月乙巳尚書

司勲庫火 顯慶元年九月戊辰恩州吉州火焚倉廩

甲伏民居二百餘家十一月己巳饒州火 武太后證

聖元年正月丙申夜明堂火武太后欲避正殿徹樂宰

相姚璿以為火因人非天災也不宜貶損后乃御端門

觀酺引建章故事復作明堂以厭之是歲內庫災燔二

百餘區 萬歲通天元年三月壬寅撫州火 久視元

年八月壬子平州火燔千餘家 中宗景龍二年二月

東都凌空觀災 元宗開元五年十一月乙卯定陵寢

殿火是歲洪州潭州災延燒州署州人見有物赤而暎
暎飛來旋即火發 十五年七月甲戌興教門樓柱災
是年衡州災延燒三百餘家州人見有物大如甕赤如
燭籠所至火即發 十八年二月丙寅大雨雪俄而雷
震左飛龍廡災占曰天火燒廡兵大起十月乙丑東都
宮佛光寺火 天寶二載六月東都應天門觀災延燒
左右延福門經日不滅京房易傳曰君不思道天火燔
其宮室 九載三月華嶽廟災時帝將封西嶽以廟災

乃止 十載八月丙辰武庫災燔兵器四十餘萬武庫
甲兵之本也 肅宗寶應元年十二月己酉太府左藏
庫火 代宗廣德元年十二月辛卯夜鄂州大風火發
江中焚舟三十艘延及岸上民居二千餘家死者數千
人 大歷十年二月莊嚴寺浮圖災初有疾風震電俄
而火從浮圖中出 德宗貞元元年江陵度支院火焚
江東租賦百餘萬 十三年正月東都尚書省火 十
九年四月家令寺火 憲宗元和二年七月洪州火燔

民舍萬七千家 七年六月鎮州甲仗庫災主吏坐死

者百餘人 八年江陵大火 十一年十一月甲戌元

陵火李師道起宮室於鄆州將謀亂既成而火 文宗

太和二年十一月甲辰禁中昭德寺火延至宣政東垣

及門下省宮人死者數百人 三年十月癸丑仗內火

四年三月陳州許州火燒萬餘家十月浙西火 八

年三月揚州火皆燔民舍千區五月己巳飛龍駒中廐

火十月揚州市火燔民舍數千區十二月禁中昭成寺

火 開成二年六月徐州火延燒居民三百餘家 四年十二月乙卯乾陵火丁丑晦揚州市火燔民舍數千家 武宗會昌元年五月潞州市火 三年六月西內神龍寺火萬年縣東市火焚廬舍甚衆 六年八月葬武宗辛未靈駕次三原縣夜大風行宮幔城火 僖宗乾符四年十月東都聖善寺火 昭宗大順二年六月乙酉幽州市樓災延及數百步七月癸丑甲夜汴州相國寺佛閣災是日暮微雨震電或見有赤塊轉門譙藤

網中周而火作頃之赤堍北飛轉佛閣籐網中亦周而火作既而大雨暴至平地水深數尺火益甚延及民居三日不滅

後唐明帝天成四年十一月汝州火燒羽林軍營五百

餘間

先是司天奏熒惑入羽林請京師為火備至是應之

長興二年四月汴州

封禪寺門上忽有火起延燒近寺廬舍相次黎陽縣亦火

後晉高祖天福三年十一月襄州奏火焚居民千餘家

周世宗顯德五年四月吳越王錢宏俶奏十日夜杭州火焚燒府署殆盡上命中使齋詔恤問

宋太祖建隆元年宿州火燔民舍萬餘區 二年三月內酒坊火燔舍百八十區酒工死者三十餘 三年正月滑州甲仗庫火燔儀門及軍資庫一百九十區兵器錢帛並盡開封府通許鎮民家火燔廬舍三百四十餘區二月安州牙吏施延業家火燔民舍并顯義軍營共六百餘區五月京師相國寺火燔舍百餘區海州火燔

數百家死者十八人 乾德四年二月岳州衙署廩庫

火燔市肆民舍殆盡官吏踰城僅免 三年陳州火燔

民舍數千區潭州火燔民舍五百區踰月民死者三十

六人是春諸州言火者甚衆八月衡州火燔公署倉庫

民舍僅存者千餘區 五年京師建隆觀火 開寶二

年八月辰州解火及燔軍資庫 五年七月忠州解火

倉庫殆盡 七年九月亳州永城縣火燔民舍一千八

十四區 八年四月洋州火燔州解民舍千七百區毫

州永城縣火燔軍營民舍千九百八十區死者九人

太宗太平興國七年八月益州西倉災 雍熙元年五

月丁丑乾元文明二殿災初夕陰雲雷震火起月華門

翊日辰巳方止 二年九月庚戌夜楚王元佐宮火燔

舍數百區王自是以疾廢於家 端拱元年二月雲安

軍威棹營火 二年三月衡州火燔州縣官舍倉庫軍

營三百餘區又崇賢坊有烏銜火燔數十處七日不滅

淳化三年十月蔡州懷愛軍營火燔汝河橋民居官

舍三千餘區死者數人十二月建安軍城西火燔民舍
官廨等殆盡 四年二月永州保安津舍火飛燄過江
燒州門及民屋三百餘家 真宗咸平二年四月池州
倉火燔米八萬七千斛 景德元年正月平敵軍營火
焚居民廬舍甚衆 四年十一月郢州火倉庫並盡
大中祥符元年正月桂州甲仗庫災 二年四月昇州
火燔軍營民舍殆盡 七年雄州甲仗庫火 八年二
月甲寅宗正寺火四月壬申夜榮王元儼宮火自三鼓

北風甚癸酉亭午乃止延燔承天祥符門內藏左藏庫
朝元門崇文院祕閣天書法物內香藥庫 九年五月
甲子左天廐坊草場火 天禧二年二月戊寅北宅蔡
州團練使德雍院火延燔數百區 三年春京師多火
六月永州軍營火延民舍數百區 仁宗天聖七年六
月丁未玉清昭應宮災初大中祥符元年詔建宮以藏
天書七年宮始成凡三千六百一十楹至是火發夜中
大雷雨至曉而盡 明道元年八月壬戌脩文德殿成

是夜中火延燔崇德長春滋福會慶延慶崇徽天和承
明八殿 景祐三年七月庚子太平興國寺火起閣中
延燔開先殿及寺舍數百楹是夕大雨電 寶元三年
六月丁丑益州火焚民廬舍三千餘區 康定元年六
月乙未南京鴻慶宮神御殿火 慶歷三年十一月丙
寅上清宮火 八年正月壬午江寧府火初李景在江
南大建宮室府事其制多倣帝室至是一夕而焚惟存
一廳乃玉燭殿也 至和二年并州太宗神御殿火

嘉祐三年正月温州火燔屋萬四千間死者五十人

神宗治平四年十二月壬子夜睦親宮火焚九百餘間

甲寅廣親宮又火 熙寧六年二月丙申永昌陵上宮

火燔東城門 七年九月壬子三司火自巳至戌焚屋

千八十楹案牘殆盡 十年正月仙韶院火撤屋二百

五十楹三月丙子開封府火 元豐元年八月邕州火

焚官舍千三百四十六區諸軍衣萬餘襲穀帛軍器百

五十萬 四年六月衡州火燒官舍民居七千二百楹

又欽州亦大雷震火焚城屋 五年二月洞真宮火

八年二月辛巳開寶寺火時寓禮部貢院於寺點檢試
卷官翟曼陳方馬希孟焚死吏卒死者十四人 哲宗

元祐元年三月宗室宮院火 六年十二月開封府火

紹聖三年三月初七日尚書省火尋撲滅上諭執政

禁中屢火方醮禳已罷春宴仍不御垂拱殿三日 四

年七月甲子禁中火 元符元年四月宗室宮院火

徽宗建中靖國元年六月壬寅集禧觀火大雨中久而

後減 崇寧二年六月太一宮火 三年三月辛丑大

內火 政和三年四月蘇州火延燒公私屋一百七十

餘間五月辛丑京師大盈倉火是歲成都府大慈寺溫

州純州皆火 八年九月掖庭大火自甲夜達曉大雨

如傾火益熾凡焚五千餘間後苑廣聖宮及宮人所居

幾盡焚死者甚衆 欽宗靖康元年十二月丙子夜尚

書省火延燒禮祠工刑吏部拆尚書省牌擲火中襍之

乃息 二年三月戊戌天漢橋火焚百餘家頃之都亭

驛又火已酉保康門火 高宗紹興元年十月乙酉行

在越州大火民多露處

令有司賑緡粟弛材葦之征

十二月辛未越

州再火吏部文書多焚乙酉降旨移蹕錢塘 二年正

月丁巳宣州大火燔城中民舍幾盡五月庚辰行在臨

安府大火頃刻跨山亘六七里燔民舍一萬數千家十

二月甲午行都大火燔吏刑工部御史臺官府民廬軍

壘盡乙未旦乃熄銓選文書無存者

令戶部發廩賑焚室

三年

九月庚申行都闕門外民廬火燔者甚廣

令戶部發廩以賑命有司

脩火政

四年正月戊寅行都火燔闌闌民廬數千家

六年二月行都屢火通燔千餘家

詔沿流州縣幾執女教問者以李光言而止

十二月行都大火燔民廬萬餘家人有灼死者時上以

劉豫入寇親征都民之暴露者多凍死

令留守秦檜發戶部米以賑

七年二月丁酉太平州大火州治宣撫司及官舍民

廬帑藏文書皆盡民之死於火者甚衆錄事參軍呂應

中死其職當塗縣丞李致虛亦死焉 九年二月己卯

行都火七月壬寅復火 十年十月行都火燔民廬官

舍延及省部十一月丁巳温州大火燔州學酤征舶等
務永嘉縣治及民廬千餘家 十一年七月婺州大火
燔郡獄倉場務寺觀甚廣民廬幾燬其半九月甲寅建
康府火燔府治三千餘區民廬三千餘家 十二年三
月丙申行都火二月辛巳鎮江府火燔倉米數萬石芻
六萬束民居之焚者尤衆是月太平池州及蕪湖縣火
皆燔民廬四月庚辰行都火九月甲子行都民居火經
夕漸近太室而滅

乙丑令有司撤火
道周廟垣二十步

十七年十二月

辛亥靜江府火燔民舍甚衆 二十年正月壬午行都

火燔吏部文書皆盡 二十六年潭州南岳廟火

即請復作

廟令有司給以緡粟

二十九年四月鎮江府火焚軍壘民廬

令有

司予財賑粟

雍熙乾道元年春德安府應城縣廐驛火

二年冬真州六合縣武鋒軍壘火十二月婺州火自是

火患不息人火之也 九年九月台州火經夕至於翌

日晝漏半燔郡獄縣治醞務及民廬七千餘家 淳熙

元年十二月丁巳泉州火燔城樓民舍五十餘家

令有司賑

恤

二年六月戊午潭州南岳廟火

令有司給錢萬五千緡粟三千斛改

作

八月嚴州火

令守臣恤之

十一月癸亥麗正門內東廡災

是歲瀘州火

郡上焚室之書不實部刺史張之俱坐貶秩

三年九月大內

射殿災延及東宮門

四年十一月辛酉鄂州南市火

暴風通夕燔民舍千餘家

令潛臣郡守賑恤之

五年四月庚寅

興州沙市火燔民舍三百四十餘家人有焚死者十一

月和州牧營火燔一百六十區

禁旅番上者居之也

七年二月

江陵府沙市大火燔民舍數千家江艦焚溺不可勝計

灼死者甚衆八月温州試士丁酉火作於貢闈

上令籍元募姓

名再試防其溢於外貫也

八年正月揚州火

九年九月合州大

火燔民居幾盡官舍僅有存者

十二年八月温州火

燔城樓居民廬四百餘家十月鄂州大火燔民居萬餘

家江風暴作結廬於隄泊艦於岸者焚溺無遺

令守臣恤之且

止民毋隄居

十四年五月大内武庫火戎器不害六月庚

寅行都寶蓮山民居火延七百餘家抹焚將校有死者

令守臣以緡粟賑之

五月成都府市火燔民舍萬家

令帥臣賑恤之

十

六年九月南劍州大火民居存者無幾 光宗紹熙元

年八月壬寅處州火延州市及民舍數百家 二年四

月行都傳法寺火延及民廬言者以戚里土木為孽火

數起之應時中宮建廟第都民之應徙者多是月徽州

大火自庚子至於壬寅夜燔州治樵樓官舍郡獄緡帑

庫務凡十九所五百二十餘區延戶廬一千五百家

部令

使者賑之粟

五月己巳金州火燔州治官舍帑藏保勝軍器

庫城內外民舍甚廣

令總饗及常平使者賑之

三年正月己巳行

都火通夕至於庚午闌闌焚者半十一月又火燔民居
五百餘家十二月甲辰鄂州火至於乙巳燔民居八百
家市井樓宇無存者 寧宗慶元二年八月己酉永州

州市火燔民廬三百家

皆令守臣賑恤之

三年五月甲申金

州都統司中軍壘舍火焚一千三百餘區閏六月乙酉

又火燔二千餘區

令予緡錢營其壘

六年七月戊戌徽州火

燔民舍八百餘家延郡獄官舍甚廣

令守臣賑恤之

嘉泰元

年三月戊寅行都大火至於四月辛巳燔御史臺司農

寺將作軍器監進奏文思御輦院太史局軍頭皇城司

法物庫御厨班直諸軍壘及民居五萬八千九十七家

城內外亘十餘里灼死之可知者五十有九人而踐死

者不可計都城九燬其七時百官皆僦舟以居

是夕火作於寶

蓮山御史臺胥楊浩居舍諫議大夫程松請
幾浩以謝都民再疏始黜萬安軍猶免決

自是都民

謫自相驚亡賴因以縱火為姦利

壬午上降次貶食下
哀痛之詔內出帑錢

一十六萬三千五百七十餘緡米
六萬五千一百九十餘石賑焚室

三年正月丁酉襄

陽府火作而風暴僅燔民舍六十家

選鋒軍校于友直
死於救焚帥漕臣

上其功贈二秩官其二子

十一月甲午福州火民舍之焚者四百餘

家四年三月丁卯行都大火燔尚書省中書省樞密

院六部右丞相府制勅糧料院親兵營脩內司延及學

士院內酒庫內宮門廡夜台禁旅入撲太室撤廟廡神

主移御壽慈宮冊寶隨之戊辰旦火及和寧門鴟禁卒

張隆飛梯斧鴟門以下不火是夕火分數道燎民廬三

千七十餘家

詔出內帑緡錢豐儲倉米以賑

己巳神主回御太室時省

部皆寓治驛寺

壬申上避路朝下罪已詔乙亥令百官直言時政闕失

六月盱眙

軍天長縣禁旅戍壘火鎧械為盡八月壬辰鄂州外南市火燔民舍五百餘家開禧二年二月癸丑壽宮火

乙卯上降
次去樂

四月壬子行都火燔民居數百家

詔出封樁
緡錢豐儲

倉粟
以賑

嘉定二年八月己巳信州火燔民廬二百家九

月丁酉吉州火燔五百餘家是歲瀘州火延及民廬一

千餘家

皆令郡
賑恤之

四年閏二月己卯紹興府嵯縣浦橋

火燔百餘家三月滁州火燔民居甚廣

皆令各郡
賑恤之

十月

撫州火辛卯福州一夕再火燔城門僧寺民廬千餘家

死者數人 五年五月己未和州火燔民廬二千家

八年八月辛丑湖州火燔寺觀及民廬三百家 九年

七月甲戌南劍州沙縣火燔縣門官舍及民廬一千一

百餘家有死者

令各郡賑恤之

十一年二月行都火燔民居

數百家九月己巳禁垣外萬松嶺民舍火延及四百八

十餘家

今出緡粟賑之

十二年二月庚寅安豐軍故步鎮火

燔民廬千餘家死傷於焚者五十餘人

令郡守賑恤之

八月庚

午慶元府火燔官舍民廬第宅寺觀甚衆

詔縣焚室而弛其年租賦

十一月壬子行都火燔城內民廬數萬家禁壘百二十

區

賑軍民緡粟令臨安府帥臣安集焚徙者且弛材葦之征

十七年四月丁卯西

和州焚軍壘及統城民廬二千餘家人火之也

守臣尚震午聞

敵焚之而適敵實不至

六月丁亥岳州火燔岳陽樓郡獄帑庫以

及民居八十家己丑又火燔百餘家

火異

周武王伐紂師渡孟津既濟有火自上復於下至於王

屋流為烏其色赤其聲魄云

註見羽蟲之異

威烈王三年冬

十一月晉有火下於北方有聲如鼓

漢成帝河平四年六月山陽火生石中改元為陽朔

朔始

也以火生石中
言陽氣之始

後漢桓帝延熹九年三月癸巳京師有火光轉行人相
驚譟

晉惠帝永康元年帝納后羊氏將入宮衣中忽有火衆
咸恠之後后竟坐廢 光熙元年五月范陽國地燃可
以爨 穆帝升平元年涼州城東池中有火姑臧澤水

中有火

石虎時石燃於泰山八日而滅 苻堅時關中土燃
無火而煙氣大起方數十里中月餘不滅

齊武帝永明十一年先是魏地謠言赤火南流喪南國
是歲有沙門從北齋此火至火赤於常火而微云以療
疾貴賤爭取之多得其驗二十餘日都下大盛咸云聖
火詔禁之不止火灸至七炷而疾愈吳興邱國賓密以
還鄉邑人楊道慶虛疾二十年依法灸即差

唐太宗貞觀十三年三月壬寅雲陽石燃方丈晝則如
灰夜則有光投草木則焚歷年乃止火失其性而沴金
也幽州坊谷地常有火長慶三年夏遂積水為池近水
沴火也

宋太祖開寶七年六月隸州有火自空墜於城北有物

如龍

詳見龍蛇之異

太宗端拱元年瀘州鹽井竭遣工入視

忽有聲如雷火焰突出工被傷 高宗紹興三十二年

建昌軍新城縣有巨室篋中時有火光燐衣帛過半而

篋不熱近孽火也

赤青赤祥

左氏傳魯襄公時宋有生女子赤而毛棄之隄下宋平公母共姬之御者見而收之因名曰棄長而美好納之平公生子曰佐後宋臣伊戾讒太子痤而殺之先是大夫華元出奔晉華弱奔魯華臣奔陳華合比奔衛劉向以為時則火災赤青之明應也京房易傳曰尊卑不別厥妖女生赤毛

漢惠帝二年天雨血於宜陽一頃所劉向以為赤眚也

時諸呂用事讒口妄行殺三皇子

高帝三子

建立非嗣

立後宮子

為惠帝嗣

及呂太后崩大臣共誅滅諸呂僵尸流血京房易

傳曰歸獄不解茲謂追非厥咎天雨血茲謂不親民有

怨心不出三年無其宗人又曰佞人祿功臣僂天雨血

武帝建元四年有風赤如血 哀帝建平四年四月

山陽湖陵雨血廣三尺長五尺大者如錢小者如麻子

後二年帝崩王莽擅朝誅貴戚丁傅大臣董賢等皆放

徙遠方與諸呂同象誅死者少雨血亦少

王莽始建國四年夏赤氣出東南竟天

後漢桓帝建和三年秋七月北地廉雨肉似羊肋

肋骨也

或大如手近赤祥也時梁太后攝政兄冀專權枉殺李固杜喬等天下冤之其後梁氏誅滅

魏公孫淵時襄平北市生肉長圍各數尺有頭目口喙無手足而動搖此赤祥也占曰有形不成有體不聲其國滅亡淵尋為魏所誅

吳成將鄧喜殺猪祠神治畢懸之忽見一人頭往食肉

喜引弓射中之咋咋

助陌反

作聲繞屋三日近赤祥也後

人白喜謀北叛闔室受誅京房易妖曰山見豫江於邑
邑有兵狀如人頭赤色

晉武帝太康五年四月壬子魯國池水變赤如血 十
年十月河陰有赤雪三頃此赤祥也是後四載而帝崩
王室遂亂 惠帝元康五年三月呂縣有流血東西百
餘步此赤祥也至元康末窮凶極亂僵尸流血之應也

千寶以為後八載而封雲亂徐州殺傷數萬人是其應也永康元年三月尉氏雨血夫政刑舒緩則有常燠亦祥之妖此歲正月送愍懷太子幽於許宮天戒若曰不宜緩恣姦人將使太子冤死惠帝愚眊不悟是月愍懷遂斃於是王室成釁禍流天下淖反奴效齒殺齊潛眉反占曰天雨血霑衣天以告也此之謂乎京房易傳曰歸獄不解茲謂追非厥咎天雨血茲謂不親下有怨心不出三年亡其宗人又曰佞人祿功臣戮天雨血也

永寧二年十一月壬寅夜赤氣竟天隱隱有聲 永興
二年十月赤氣見於北方東西竟天 愍帝建興元年
河東雨肉

劉聰偽建興元年雨血於東宮延明殿徹瓦在地者
深五寸又雨血平陽廣袤十里平陽地震其崇明觀
陷為池水赤如血赤氣至天有赤龍奮迅而去流星
起於牽牛入紫微龍形委蛇其光照地落於平陽北
十里視之則肉臭聞於平陽長三十步廣二十七步

肉傍常有哭聲晝夜不止數日聰后劉氏產一蛇一獸各害人而走尋之不得頃之見於墮肉之傍時聰納劉殷三女為后逆骨肉之綱亂人倫之則墮肉諸妖其青亦大俄而劉氏死哭聲自絕

石虎末雨血周遍鄴城

梁武帝天監十五年七月荆州市殺人而身不僵首墮於地動口張目血如竹箭直上丈餘然後如雨細下是歲荆州大旱近赤祥冤氣之應

陳宣帝大建十四年正月御座幄下見一物如車輪色
正赤尋而帝患無故大叫數聲而崩 後主至德二年
十二月有赤物墮於太極殿前初下鐘皆鳴又嘗進白
飲忽變為血又有血霑殿階漑漑然至御榻俄而國亡
北齊武成河清二年太原雨血劉向曰血者陰之精傷
害之象僵屍之類明年周師與突厥入并州大戰城西
伏尸百餘里京房易飛候曰天雨血染衣國亡君戮亦
後主亡國之應 四年有物墮於殿庭色赤形如赤漆

鼓帶小鈴衆星隨者如小鈴四月婁太后崩 武平中
有血點地自咸陽王斛律明月宅而至於太廟天戒若
曰殺明月則宗廟隨而覆矣後主不悟國祚竟絕

隋煬帝大業十三年上徙居丹陽將遜居江左有石自
江浮入於揚子日光四散如血上甚惡之次年遇弒

唐高祖武德七年河間王孝恭征輔公柘宴摩師於舟
中孝恭以金盃酌江水將飲之則化為血孝恭曰盃中
之血公柘授首之祥 武德初突厥國中雨血三日

武太后光宅初宗室岐州刺史崇真之子橫抗等夜宴
忽有氣如血腥 武后時來俊臣家井水變赤如血井
中夜有吁嗟嘆惋聲俊臣以木棧之木忽自投十步外
長安中井水晉祠水赤如血 中宗時成王千里家有
血點地及奩箱上有血淋漓腥聞數步又中郎將東夷
人毛婆羅炊飯一夕化為血 中宗景龍二年七月癸
巳赤氣際天光燭地三日乃止赤氣血祥也 元宗天
寶六載少陵原楊慎矜父墓封域內草木皆流血慎矜

令浮屠史敬思禳之退朝裸而桎梏於叢棘間如是數
旬流血不止 十二載李林甫第東北隅每夜火光起
或有如小兒持火出入者近赤祥也 十三載汝南葉
縣南有土塊間中有血出數日不止 肅宗寶應元年
八月庚午夜有赤光亘天貫紉微漸移東北彌漫半天
代宗大厯十三年二月太僕寺有泥像左臂上有黑
汗滴下以紙承之血也 德宗貞元二年十一月壬午
日沒有赤氣五出於黑雲中亘天 十二年九月癸卯

夜有赤氣如火見北方上至北斗 十七年福州劍池
水亦如血 二十一年正月甲戌雨赤雪於京師 憲
宗元和十四年二月鄆州從事院門前地有血方尺餘
色甚鮮赤不知所從來以為自空而墮也 穆宗長慶
元年七月戊午河水赤三日止 敬宗寶曆元年十二
月乙酉夜西北有霧起須臾遍天霧止有赤氣或淺或
深久而乃散 文宗太和元年四月庚戌北方有赤氣
中有數白氣問之六月乙卯夜西北有赤氣八月癸卯

京師見赤氣滿天 二年閏三月乙卯北方有赤氣如
血 懿宗咸通七年鄭州永福湖水赤如凝血者三日
僖宗乾符六年中書政事堂忽旦有死人血污滿地
不知主名又御井水色赤而腥漂之得一死女子腐爛
近赤祥也 中和二年七月丙午夜西北方赤氣如絳
際天 光啓元年正月潤州江水赤凡數日

宋神宗熙寧二年十一月每夕有赤氣見西北隅如火
至人定乃滅 哲宗元祐三年七月丁卯夜東北方明

如晝俄成赤氣內有白氣經天 徽宗建中靖國元年
正月朔夕有赤氣起東北彌亘西方久之中出白氣二
及赤氣將散復有黑氣在其傍 欽宗靖康元年九月
戊寅有赤氣隨日出 高宗建炎元年八月庚午東北
方有赤氣占曰血祥是歲金人再犯京師遂南牧兵禍
拏結流血之象也 四年五月洞庭湖夜赤光見東北
亘天如火明照湖心上一色俄轉東南此赤祥也後
金兵犯湘沔又鍾相孔彥舟曹火星劉超彭筠楊公巨

盜相繼荼毒一道即其驗也 紹興七年正月乙酉北

方有赤氣達旦辛卯東北有赤氣如火在牛斗間十一月癸卯南方有赤氣東西北皆赤雲自日入至於甲夜皆赤祥也 八年九月甲申赤氣出黜微垣 十八年

八月丁亥九月甲寅皆有赤氣如火 二十年十一月

建昌軍新城縣永安村風雪大作夜半若數百千人行聲語笑歌哭雜擾匆遽而凝寒陰黑咫尺莫辨窺之無所睹明旦雪深有人畜鳥獸跡流血汙染十餘里入山

乃絕近血妖亦赤祥也 二十七年三月乙酉赤氣出
紫微垣七月壬申赤氣隨日入 三十年二月壬申皆
有赤氣如火 三十二年春淮水溢中有赤氣如凝血
先是金國主完顏亮入寇駐揚州為其下所弑至是始
遁淮水凝血逆氣之應也鄭景純曰血水類同屬於坎
後連歲旱亦其驗也 孝宗隆興二年十一月庚寅日
入後赤雲隨之 乾道元年八月壬午赤氣中天自日
入至於甲夜 六年十月庚午赤氣隨日出十一月丁

丑赤雲隨日入至於甲夜 七年七月壬寅十月戊午
己未八年十月乙巳丙午淳熙三年八月丁酉戊戌皆
有赤氣隨日入出 十三年行都民舍有血自地中出
濺屋梁汙人衣近赤祥也 十四年十一月癸丑甲寅
有赤氣隨日入出 光宗紹熙三年春潼川路久旱日
月星皆帶赤氣 四年十一月甲戌赤雲夜見白雲間
之近赤白祥也 寧宗慶元六年十月赤氣夜發橫天
嘉泰四年二月庚申夜有赤雲間以白氣東北亘天

後八日國有大火言者以為火祥 嘉定六年十月乙
卯赤氣隨日出十一月辛卯赤氣隨日入



文獻通考卷二百九十八